

四庫全書

史部

欽定四庫全書

史部

四川通志卷三十八之一至六

詳校官監察御史臣李陽樞

檢討臣德生覆勘

總校官編修臣王燕緒

校對官助教臣劉景岳

謄錄監生臣王錦

欽定四庫全書

四川通志卷三十八之一

隱逸

易稱漸陸詩詠考槃古隱君子者流類多混迹樵
漁澹情軒冕士各有志無庸強耳蜀為山水奧區
故遺榮守道之儒巖棲谷飲每有獨往之蹤焉歷
朝以來講君平之卜賣桃椎之屨者正不止一二
輩要其寄懷沖澹如孤雲野鶴超然物表夫豈雋

俗之士假捷徑於終南索高價於少室者所可同
日語哉作隱逸志

成都府

漢李

弘

字仲元成都人少讀五經得其精義不求利達里中薰其德者班白不負擔男女不

錯行後舉茂才不就羅充嘗遺以金固却之隱居衡門緼袍莞席揚子雲稱之曰不屈其志不辱其身不夷不惠居可否之間

鴻

安

成都人與嚴君平友善君平卒安諫之曰無營無為澹然淵深

楊

厚

字仲桓新都人父統精天文厚習父業順帝徵之拜議郎遷侍中梁冀以車馬遺之

不受歸授門徒三千餘人
李固徵之不起卒諡文父

唐朱桃椎

成都人高益州士廉遺以衣逃入山中夏則裸形冬則樹皮自覆每織芒屨置路旁

見者皆言朱處士屨也易米置其地朱至夕取之終不見人

宋孫知微

字思邈成都人張詠鎮蜀雅慕之終不可致及還朝出劒閣一邛童持思邈畫以進

詠問孫所在答曰已去遠矣馬知節守成都造訪解金帶以贈卽繫之苧袍人見其標韻蕭散皆以爲李青蓮也

張愈

字少愚一字淑才本晉人徙蜀居郫城性通敏幼異凡兒薦聖經並好漢書不讀

百家言旣冠適四方與時之豪傑游日相薰炙業遂大成才豪氣逸武功蘇舜欽以詩豪當時一見

愈大推服仁宗朝西戎入邊愈上書陳攻取十策
寶元初除校書郎願以授父顯忠而自隱青城山
之白雲溪凡六辭召命文潞公有詩云欲作外臣
誰是友白雲猿鶴在巖扉任易宗詩懶隨六品仕
丹闕高臥一峯藏白雲所著詩文凡若干卷妻蒲
氏亦知學文章精義有聲於時愈在青城山常自
為詩徧題壁上臨風對月翛然有高視一世之意
聞佳山水不辭千里而往愈卒蒲氏為文以悼之
辭最工蜀士大夫多傳焉右丞何聖從銘其墓曰
昔莊子之才子雲珍之謂其久幽而不改其操今
少愚亦隱於蜀不苛利欲不求聞達在莊之
後十有餘歲其風凜然可以與之相追矣

章

簪

字隱之雙流人博通經學尤長易太玄著
發隱二篇蜀守蔣堂張方平趙抃咸以逸

民薦於朝賜粟帛命為州助教不就嘉祐中賜號
冲退處士王素時為州守因更其居之鄉曰處士

里曰通儒坊曰沖退簪導生養氣憂喜是非不膠
於心常謂友人范百祿曰君子能強其所不足拂
其所有餘太玄之道幾矣此子雲仁義之心予之
於太玄述斯而已若苦其思難其言迂溺其所以
為數而忘仁義之大惡足語道哉年七
十六卒子禩好古學道所居猶存遺蹟

郭長孺

成都人風致閒逸遇人無貴賤悉禮下之
然其中挺拔不倚終日劇談無戲語惟好

書丹鉛點勘不去手自經史百氏浮屠黃老陰陽
醫卜之術皆究其妙有易解書解道德經解蔬食
譜歌詩雜文等書又作孝行圖高
逸圖陰陽雜證圖各為論述焉

雍桶翁

成都隱者程伊川在蜀嘗見其挾冊入市
就視之則易也因質所疑酬答如響問其

姓名不言及問未濟卦曰三陽皆失位
也後袁滋問易於伊川曰易學在蜀

郭震

成都人博學能詩有飄然物表之志所著有漁舟集李旼稱其有孟郊風

楊匯

成都人杜門著書善賦詩人無知者邵伯溫為部使者薦其學行甚高清節甚苦不

報及卒學者謚為靜恭先生

郭希樸

華陽人以博學聞尤通於易任价以方郭林宗號有道先生能前知死生之故李旼

為錄其事

鄧至

雙流人通六經學者從之甚眾每入市邑人皆拱立著往事龜鑑通書一江集子綰

翰林學士孫洵仁尚書洵文知樞密院事

白如璧

新都人博覽羣書隱居不仕避兵入山不食而死

蘇雲卿

漢州人紹興中寓豫章布褐草履終歲不易少與張浚為布衣交浚入相馳書函金

幣屬帥漕致之帥漕因請見期之詰朝及翌日往謁局戶間然書幣俱在而翁已逝去不知所往

元杜

圭

新都人勤學尚友通五經尤長於春秋隱居授徒來學者衆廬舍至不能容

明楊

敏

字學可新都人師杜圭博通經史避兵雲南還蜀明玉珍迫之不仕洪武中命賜鈔

歸隱蜀獻王給田八十畝贈云流水畫橋題柱客清風精舍讀書人

徐宗敬

成都人博學工詩文自負甚高天順間被徵不起所著有中白子集傳於世

徐

禔

華陽人字山甫自幼穎悟靜篤人鮮窺其涯際中正統丁卯鄉試再上公車遂絕意

仕進撫按廉其賢薦除夷陵倅不受徧遊吳越以山水詩文自娛家居別築一室書孫綽體識玄遠

出處同歸二語於壁間蓋自况云晚年德高行成
當事欽慕片言隻字奉若典型或過地方大事撫
按就商之悉見之行事有欲興致之者意不
可得卒年九十九所著有忠愛堂稿行於世

李政之

簡州人正統間入鄉闈搜檢懷挾政之正
色言曰國家掄才方勤咨訪乃今囚首裸

足以希進取乎遂不入
試隱居杜門嘉靖初卒

張紹宗

雙流人年九十六猶讀書談道隱竹溪業
漁釣孔令入溪訪之與紹宗遇班荆而坐

抽琴鼓南風之操賦詞十二首歌
而贈之令扁其門曰竹溪清隱

汪懷

字惟德其先婺源人從祖指揮使居蜀懷
少失父鞠於母從師苦學能詩文往來吳

楚以贍母養一日寓吳賦懷歸詩曰乘舟清夜鶴
鳴孤一曲夷猶過鏡湖栗里喜培三徑菊錦江何

羨四腮鱸夢回巫峽猿聲切目斷衡陽雁影迂白
首歸來猶及養北堂稱壽學萊夫士大夫嘆曰隱
君子也

田

本

新都人清心苦行博學好古結廬
高隱不求聞達年九十無疾而終

劉

訃

彭縣人受易於其父浩深得奧旨卽邑中
文昌祠為書院聚鄉里俊髦與子士元日

相琢磨值歲荒為粥賑饑凡戚屬
不能喪葬者咸資之人服其德

陳

愛

字處友華陽人成化間隱士洒落不羈以
義自守文學宏博尤長於詩非賢長史不

見嘗有臬使再至其門愛輒先逃臬使怒檄召將
辱之庭愛從容以詩呈曰折簡慙慙累見尋布衣
寧敢謁朝簪明公有道持身正賤子無知感德深
柏府風霜尊偉望柴門山水遂閒心雲泥兩地無

勞顧魚戀深淵鳥戀林乃解以授徒自給師道嚴整出其門者多俊良閭里愚氓亦知有陳先生也

有華山人

詩集傳世

劉大昌

別號珥江成都人嘉靖戊子鄉薦性恬淡高潔不樂仕進時內閣楊石齋先生當國

大昌益引避不出日惟詩賦自娛絕迹公府常與楊用修太史倡和錦城大見稱賞用修著作多所

訂正幕府聞其賢首訪之大昌堅避士君子咸高之

朱之臣

字菊水成都人萬歷間進士歷官所在著績崇禎初任江西右布政使因飛語逮繫

刑部獄人咸為之臣危一夕莊烈帝夢兩僧在獄中笑語命內臣陰伺之則之臣與某對局談笑自若因釋之後官至刑部右侍郎退隱石城自號曰青樵老叟年九十猶著書不輟里人咸矜式焉

皇清趙司鉉

字退公彭縣人弱冠舉於鄉制府李國英敬其品學多與商論政務勸之仕弗應及

歿國英哭曰若趙司鉉不愧靜正之士

重慶府

漢尹珍

南川人桓帝時從汝南許慎學受五經還里設教於鄉巴渝之人始知學

宋譙定

涪州人少學易於程頤頤貶涪定又從之靖康初召為崇政殿說書高宗卽位詔遣

詣行在將大用之會北兵至定遂歸涪後居青城山蜀人稱譙夫子云

張宗範

合州人有文行居嘉陵江建亭於學土山麓周濂溪至而愛之為名其亭

李鈞鰲

綦江人長於吟咏好詩菊作菊坡亭

元雲山翁

山壁山人元末明氏據重慶以萬戶侯詔
山翁不就結廬於五峯山有雲山詩集

明趙天澤

江津人元至正間至江東嘗同劉基游武
林泛西湖見異雲起衆皆目為慶雲將分

韻賦詩基獨滿飲不顧曰此天子氣也應
在十年後有王者起我當輔之時杭城猶
全威諸人駭以為狂無知基者惟天澤奇
之以為諸葛孔明之流乃為文以贈基天
澤歸基亦以詩贈之

胡子義

大足人膺辟薦分教威遠歷山東僉事聞
兄子昭死節遂棄官避世隱於丹稜民家

蜀獻王知而憐之生二子各已數歲乃語
曰天不絕胡氏二子當免於難遂棄去不
知所終子義有懷鄉詩曰一區廢宅棠山
下半畝方塘夕照中鄉國匪遙身自遠乾
坤雖大足難容

鄧鎮

永川人通六籍諸史善屬文性剛鯁議
論持正成化中走京師以言忤權貴下錦
衣

獄拷掠折一足既而赦回教授於鄉以終

鄒玉

江津人隱居不仕詩多佳句月夜溪行云

云樹色秋來減泉聲雨後增夜飲云清香浮竹葉古調落梅花山行云好景須留戀浮名且罷休

王儉

銅梁人成化中嘗官都御史有政聲後削籍山居尤多高行

余成歲

合州人號太初所行俱敦古道處波靡中峻操凜然清不絕俗和不混同恬不近名

讀書博綜經史研究性學每求實踐不事空言以明經對詔大廷歸遂堅意不出儀型後學郡守羅式其廬曰孝友博學洵無愧潛德云

何朝鳳

長壽人幼業儒長讀關閩濂洛書遂廢舉子業隱居西山力敦古道置義田義宅瞻

族賑貧恤孤拯急郡縣徵請不應惟教子課農著書勸俗為務著有克己編袁氏功過格注年九十終無疾

劉

戡

綦江人崇禎間貢生樂志林泉不求仕進以書史自娛年九十有六氣清形健

龔懋熙

江津人生而穎異能識泰山石敢當五字七歲能文崇禎己卯舉於鄉時年十八旋

登進士任太常博士後以養終歸里奉二人居山中怡情丘壑屢徵不起有歷圖四書講語梧竹居草

鄧必威

綦江人博學多識為士林模楷副使段師文聞其賢嘗造廬聽講周易題其門曰雲

山數畝

皇清陳于夏

江津人由貢生選梓潼訓導母張氏年十八孀居撫于夏成立至是老病難遠涉于

夏遂辭職不赴家居養母沉酣
典籍年八十卒有歷代典故抄

林明雋

字位旃鄆都人學富經史甲申獻寇陷蜀從閣部王應熊討賊籌策多中後以病假

歸屢徵不出隱居著述有澹
遠堂巴子園桐梧居等集

湯學尹

黔江人年十二應童子試以能賦稱奇童後登康熙癸卯賢書黔邑兵燹之餘經學

失傳學尹聞明易理教授生徒咸暑嚴寒講習不倦名其齋曰勉菴潛心理學值吳逆之叛遁迹山林不履城市人
稱為勉菴先生

保寧府

漢杜胄

廣元人察孝廉明經不仕

唐南中

巴州人工詩隱居平涼仙洞

宋王省

劍州人太宗召對稱旨辭爵不受號清虛山人

嚴大猷

蒼溪人方山隱士吳曦叛於蜀大猷賦詩云笏未到時難擊此兵如入手易擒吳有

方山集
四卷

元袁大用

南江人為四川制置總領元帥值亂歸再詔不起號隱君

明鄭本

昭化人登永樂甲午賢書雅志邁軸不樂仕進士林仰之

賈瑄

巴州人高尚其志足跡不入公府號白厓御史任儀亭曰清風凜凜足以植名教而

激頽俗白厓有處
士若增而高矣

母道

劍州人少警敏或試畫鵲應筆成詞充弟子員每試冠軍後居艱遂臥不起士大夫

強之出應明經受部牒遽還杜門蓋獨行君子也
性孝友兼急人難所著書若干卷名東漁存稿藏
家於

梁一言

劍州人少從塾師習句讀卽有志聖賢年
既富築室琴山談道講義郡守慕其高相

繼造廬侍御馮空督學姜寶大學士夏言郡侯楊
某皆題其門曰振古人豪曰劍南喬岳所著有心
法要旨家塾彙訓三動錄恕
齋文集詩學雜詠藏於家

順慶府

晉譙秀

南充人譙周孫少靜默郡察孝廉舉秀才皆不就李雄據蜀慕秀名徵之不應冠皮

弁敵衣躬耕山藪桓溫滅蜀遣使勅所在有司四時存問

唐蓬池隱者

李太白金陵江上遇蓬池隱者詩心愛名山遊身隨名山遠羅浮麻姑臺此處

或未返遇君蓬池隱就我石山飯空言不成懽強笑日已晚綠水向雁門黃雲蔽龍山嘆息兩客懷徘徊吳越間共語一執手留連夜將久解我紫貂裘且換金陵酒酒來笑復歌興酣樂事多水影弄月色清光奈愁何明晨掛帆席離憾滿清波其為太白所賞如此

宋馮休

南充人真宗時不應辟召於小方山隱居著書

李士寧

蓬州人歐陽永叔詩蜀狂士寧者不邪亦不正混世使人疑詭譎非一行平生不把

筆對酒時高詠初如不著意語出多奇勁傾財解
人難去不道名姓金錢買酒醉高樓明月空床眠
不醒一身四海卽為家獨來萬里脚乘興旣不採
藥賣都市又不點石化黃金進不干公侯退不隱
山林與之遊者但愛其人而莫見其術安知其心
吾聞有道之士遊心太虛逍遙出入嘗與道俱故
能入火不熱入水不濡嘗聞其語而未見其人也
豈斯人之徒與不然言可純師行可純得而滑稽
玩世其東方朔之流乎

黃蓬石

蓬州人嘉祐巖記稱李士寧
黃蓬石擅名物表出處無考

何羣

西充人慶歷中在太學請復古制又上書
言三代選士先行誼後世專以文詞請罷

去詞賦科諫官御史亦以為言廷議聽其說而不
行羣乃取平生所為賦八百餘篇焚之徑歸不復

舉進士嘉祐中何剡表其行賜號安邑處士趙
抃知益州奏羣遺稿云非若茂陵書也寢不下

姚邦基

岳池人舉進士知尉氏縣值劉豫僭竊邦
基遂棄官去聚徒教授隱於山林豫敗詔

以京秩
不就

張先

蓬州人南渡後取徐孺子傳讀而嘆曰危
邦不入亂邦不居如徐孺子之制行斯可

也遂潛修自得足迹
不入城市墓在蓬池

趙真一

師仁之後義不仕元隱居終
身趙古則製碑比之伯夷氏

明王鉞

營山人永樂中中式隱居翠屏山不仕號
竹壑老人言動不苟侍御史方昇贈以詩

曰曾向蟾宮折桂花歸來林下度年華
於今兩鬢俱成雪萬竹森森暮景賒

趙之屏

南充人嘉靖戊戌進士任大理評事多所平反歷貴陽憲副湖廣叅政征苗有功後

致政歸讀書於方山洞著有洞林夢語石病遺響等書

趙祖益

南充人精易學明性理著述博雅純正不作雕蟲語居鄉恂恂長者至老手不釋卷

人稱嗜學醇儒

王行之

西充人嘉靖中貢生澹泊自甘絕意仕路化行鄉黨以敦本行為先

甘鳴鶴

字羽嘉隣水人明末貢生不樂仕進築室於老君山齊名天逸聚徒講學每遇佳節

率弟子登山臨水隨景吟咏有天逸齋稿年六十有四卒

任準

渠縣人博極羣書屢舉不第遂隱居著書有任子迂言籌畫寰區並周易解等書悉

天人性命之理經世宰物之方學使聞而嘉之曰
此吾鄉陳茂烈之流也表其門曰羽儀百世年七
十終友人朝議大夫傅嘉行為之銘

于仕華

營山人幼篤學遊太學思親衰老即日歸養安貧盡歡其孝思高志如此

李兆襄

南充人明經不仕教授生徒講濂洛心性之學著述甚富

皇清傅惟清

字天一明末渠邑諸生博文強識高尚不仕撫軍李國英聞其名徵之居幕府數月

即辭歸
以壽終

敘州府

宋李見

富順人嘗讀易神龜山著易樞天禧中上令附驛以聞不願仕進監司亦不能屈

明劉

琬

郡人洪武初處士造舟活溺子孫至今有顯貴者

何漢臣

慶符人以貢赴京廷試遇新都楊慎於塗同作喜雨詩慎服其工至京以鄉人廣為

延譽漢臣恥焉遂歸里隱我眉山年八十有三卒著述甚富

周一麟

高縣人歲貢生不樂仕進蔬食水飲窮約自甘弟二麟拔貢生授貴州石阡府司理

旋卽致仕退居畎畝訓誨生徒伯仲偕隱士林高之

余仲

高縣歲貢生矢志高尚山居讀書銓選不出

皇清李之藻

珙縣人順治庚子舉人任合州學政課士有條滇南煽動遂隱遁深山尋卒

鄧元功

屏山人貢生康熙己丑訓導黔江因道路險遠不能迎養遂請致仕隱居奉二人菽

水暇則讀書教
子三子俱明經

夔州府

宋王

珪

萬縣人築室南溪號志堂居士左右植松竹逍遙其下一時名流喜其高尚榜其居

曰竹
隱

明熊士傑

新寧人幼嗜學通曉經義及百家醫卜諸書隱居循禮有吟稿藏於家

川中補鍋匠

不知何許人往來夔慶間為人補鍋至州邑不過三日即去或復來有

欲學補鍋者即教之補鍋不索謝錢直令負擔從有後學者至即令先學者去如是數年人皆識之呼為老鍋匠或售以錢布米亦不擇當食時與之食即不復索錢錢稍稍積囊中遇風雨寒暑不出

補鍋以錢買酒飯自飲食嘗寄宿蕭寺一日於市中逢馮翁者二人相顧愕然已而相持哭哭已相牽入山巖中坐語竟日學補鍋者屏不得聞二人語語已又相持哭且別去言今永訣不可復相見後竟莫知所終或曰建文遺臣也

馮翁

亦不知何許人在夔州以章句教童子給衣食能為對句及古詩詩尾輒自題馬二

子或馬公或塞馬先生嘗作詩大書壁間云夜夢何奇特雲飛天漢津朝橫滄海曲夕過滇池濱光燁皆五色蜿蜒無損鱗淵田變化間張主藉高旻後見補鍋匠歸即剗去時蓋永樂甲申己酉間也後亦莫知所終

皇清沈巨儒

字越鷄萬縣人明季避亂遂隱於山號西溪野人時總督李國英知其夙學勸之仕

不應聞草堂以
詩文自娛卒

龍安府

宋胡

仲

郡人隱居授徒徵辟皆不就名士許
鼎輩師事之人呼其居為胡仲山

皇清胡茂林

平武人躬耕隴畝不入城市惟以詩禮訓
課子孫享壽百有五歲人稱百歲翁邑令

屢旌
其門

雅州府

明梅元吉

字復之州人自號夢周山人隱
居不仕著述終老有雅安近紀

程之緒

蘆山人博綜書史善屬文性端方動合
規矩隱居教授著經濟內外篇祀鄉賢

皇清竹郎喬

字水生蘆山人詩文下筆立就明季兵燹後舊家典籍皆為灰燼郎喬口授手書以

教後進時有興朝伏生之目

竹全仁

字冬茁蘆山人郎喬孫也能紹述祖志潛心經史縣令楊廷琚聘纂邑志採輯頗詳

年六十餘貌若少壯著有中庸衍義

李玉立

字躬標號白衣州人性情恬澹不求名利傍祖墓結廬獨處二十餘年年七十卒有

四書釋義香亭詩養心論諸集

直隸嘉定州

雍正十二年陞為府設樂山縣為附郭

唐唐球

州人不應王建辟嘗納詩稿瓢中投之江有見之者知為唐山人瓢接得之

宋王庠

榮縣人夢易子七歲能屬文早喪父哀痛深切與弟序閉戶窮經期繼父志未幾罷

制科序嘆曰無愧先訓足矣復自陳與二蘇范純仁為知己係元祐黨屏居田里卒諡賢節

王陽

隸為人與黃山谷遊山谷稱為高曠之士

李圃

州人淳熙中為忠州別駕歸隱白茅山築秀發齋清風高節人至今慕之

師伯渾

隸為人陸放翁序其文集云伯渾文章英發鉅麗歌之清廟刻之彝器然後為稱今

一不可得而施顧退而為山巔水涯娛憂紓悲之言豈不可感哉

明張瑛

字玉華州人才器高邁性嗜學治詩書二經善屬文工詩孝親友弟俱可為鄉閭法

潛德弗售郡守召之不應

尹東郊

字敬孚始為滇人父任榮縣令愛蜀中山水遂占籍嘉州東郊博學善為詩郡守魏

瀚甚禮重之列其狀於朝將官之弗受人稱尹聘君云

夏迪簡

州人以選貢中崇禎壬午鄉試學行純粹隱居教授足不履公庭年八十不替所守

士林重之

梁應奇

字平叔州人登崇禎戊辰進士為江南宣城令多惠政後遭亂避地牂牁不復求出

皇清萬月庚

我眉人康熙己酉舉人吳逆迫以偽職堅不出及吳逆殄滅凡抗節之士多採錄授

官而月庚已
辛人咸惜之

直隸眉州

明余承勳

青神人進士官至翰林修撰嘉靖間議大禮被杖錦衣百戶王邦奇又假以建言邊

情誣兵部主事楊惇惇子與承勳友善復讐誣被逮後復職還家著書三崑山中四十餘年前後撫按屢為薦剋卒不起今三崑深處猶有方池道院云

直隸邛州

漢胡安

臨邛人隱居白鶴山講學司馬相如從之受經

嚴遵

字君平本姓莊避明帝諱改姓嚴臨邛人常賣卜成都市中與人子言依於孝與人

弟言依於悌與人臣言依於忠日閱數人得百錢則閉肆下簾著周易揚雄每稱之李疆為益州刺史欲辟為從事雄曰君但可見不能屈也疆見遵服其清高以雄為知人云

宋李

繪

州人舉八行不就以文史自娛所著有補註唐詩二百卷

直隸潼川州

雍正十二年陞為府設三臺縣為附郭

漢王

祐

州人隱居不仕陳紀山善知人稱祐為天下高士

馮

信

遂寧人博學好古公孫述累徵不就託目盲以自晦士林高之

唐陳元敬

射洪人倜儻豪俠歲饑發粟萬斛賑鄉里以明經擢第拜文林郎武后居攝遂山

棲谷飲
不復出

馮中德

樂至人博學能文有純雅之操不樂進取後進爭師事之子壻諸孫皆登科第

趙

璉

鹽亭人明皇屢徵不起隱於梓州之長平山博考六經諸家同異著書號長短經明

王霸大略李白嘗造其
廬訪焉有詩載文苑

嚴本
鹽亭人震之父也負不羈才得
遜世趣浪迹方外超然絕塵

宋張震
遂州人工文詞不仕所作有薦
山溪詞二闕載在草堂詩餘

王灼
遂寧人文詞古雅隱居
不仕所著糖霜譜一卷

蘇伯起
中江人易簡九世孫好古學聚書萬卷靡
不窮搜劉德修舉賢良方正吳德夫以遺
逸薦於朝
皆不應

牟煥
中江人隱居讀書嘗鑿石龕藏
書有銘人名其地曰牟公谷

郭奕
不知何許人初為宣司幹官紹興元年張
浚自陝西歸過漫天坡奕為詩諷之因罷

為通判不赴寓居
普州以賣餅隱

明楊

襄

字希臯安岳人清修博洽累試不售作詩曰莫道儒冠解誤人時窮時達總吾身山

中田地寬如許樵笠漁蓑都是春遂隱居瑞雲山四十餘年有瑞雲集數萬言一日盡焚之曰毋以是沽名也

未幾卒

申錫

州人嘗作先天太極諸書自一歲一月一日一身皆有圖說至於九疇會極中央立

極中星合極復分畫而附益之又作三易圖以釋其義讀書至老不倦

謝秉德

遂寧人性好讀書厚重質直不事華靡以古陳太丘自期許

章愚

遂寧人純孝根於天性絕意功名足跡不履城市

周震

州人博學能詩隱居不仕題潼川八景詩贈灸人口年九十作自輓詩無疾終人號

之曰清風高士

錢仁

字考槃州人博極羣書善吟咏誦唐詩品類全部暨樂隱集有梅花三百詠著述極

富嘗與郡守胡纘宗遊所居去州城百
里足跡不至城市纘宗每單騎就之

直隸瀘州

宋呂伯佑

州人授徒於龍巖書院具徒文楊諸子相繼登科

蕭子雲

納溪人善詩文偽夏屢徵不就號石隱子有詩集為當時名流所推重云

史扶

州人與許沆同里隱居不仕以詩名與沆多賡和時號瀘南逸老

明柳彥碩

州人。力學博覽。刺史以明經累薦。不起。教授鄉閭。後進俱登臚仕。

賀

顥

州人。隱居不仕。潛心經史。家貧。精河洛數。以自給。言動不踰矩矱。士論擬之陳太丘。

云

馮

時

字榕邨。合江人。少補博士弟子。後棄巾服。隱居。食貧有司。重其名。希一面不可得。嘗

與新都楊慎
為忘形交

王

統

字蜀元。合江人。誅茅榕山下。詩書自娛。至老不倦。里人評其品骨清邁。如露鶴溪松。

年七十
餘卒

張我南

合江人。學問淵博。不屑仕進。與名流結青蓮社。為文史之娛。里中問字者咸執經造。

焉

皇清顏欽明

州人舉孝廉潛心經史漢逆據蜀以虛文峻法迫脅士大夫欽明抗節不屈事平謁

選赴京復以病歸結屋玉蟾山下二十餘年不入城市人稱堯日巢由

直隸資州

宋喻汝礪

仁壽人有氣節工詩文靖安進士建炎初為祠部員外郎不附割三鎮之議聞金人

立張邦昌遂掛冠歸隱於邛山之陽自號捫膝先生

明陰秉衡

字振平內江人隱居作文翰樓貯書十卷手不停波口不輟吟生平著述惓惓於天

理人欲邪正之辨嘗叅酌朱子家禮為陰氏慎終錄又著婚禮節要鄉人呼之曰隱君子

直隸綿州

漢任

安

字定祖綿竹人少受太學孟氏易通數經行尚古道又從同郡楊厚仲桓學圖識究

極其奧時人稱曰居今行古
任定祖欲知仲桓問任安

明關大節

安縣諸生性嗜潔有烟霞癖每晨起必至水濱櫛沐徘徊瞻眺而返後應省試唱名

日出遊錦水濱巾櫛畢而棘園已
局遂浩然歸里散佚林泉終老焉

趙顯貴

安縣人雅慕高尚棄舉子業心游物外不入城市年七十無疾而逝舉棺甚輕人訝

為尸
解

皇清張性倫

字桓宰安縣諸生寇亂建草堂於西巖種花自娛順治乙酉為獻賊所害

趙熠

字方開安縣人獻賊屠城安邑諸生二百人一時殆盡熠知幾先遁後遂棄儒服讀

書終

老

王任閤

梓潼人康熙壬子舉人吳逆僭亂強徵不出隱遁山中窮約終身年八十餘

直隸達州

宋樂喜聞

州人築草廬於城西家貧授徒自給不事干謁與諸生談經日誦百篇未有倦意

四川通志卷三十八之一

欽定四庫全書

四川通志卷三十八之二

流寓

自昔英人哲士其旅寄所至每令人流連俯仰且
謹識之以示無忘覺名勝之蹟亦有藉以增色者
焉蜀為蠶叢之國古稱行路難矣而山川之峭深
風氣之古樸在搜奇攬異之士徃徃來游來歌甚
且畱之遲久而不能去彼其清風雅檠不但與蜀

土名賢相得而益彰即千百載下追踪高躅者猶當憑眺興懷慨然有餘慕耳作流寓志

成都府

唐杜甫

字子美本襄陽人先世徙河南鞏縣肅宗乾元二年冬甫入蜀上元元年卜居成都

西郭浣花溪上成都尹裴冕為築室堂嚴武再鎮蜀表為叅謀檢校工部員外郎待之甚厚嘗詣草堂訪之甫為詩渾涵汪洋千彙萬狀兼古人今人而有之忠不忘君情見乎詞又善陳時事人稱詩史

段成式

字柯古臨淄人為校書郎博學強記多奇篇秘書父文昌鎮成都成式侍父於蜀為

書工麗所引故實多前人所未用者人咸驚異之著酉陽雜俎記蜀事甚多

張古道

臨淄人唐景福中進士為右拾遺時方鎮擅兵古道上疏詞語切直謫施州司戶叅

軍後入蜀變姓名賣卜導江青城市中王建據蜀召為武部郎中至玉壘關謂所親曰吾唐室諫臣雖召必死死之日葬我於關東不毛之地題曰唐左補闕張古道墓可也後果遇害

五代母昭裔

字知古中州人貧時借文選於交遊見有難色遂發憤曰異日若貴當鏤板以

遺學者後避難依孟蜀仕至宰相遂鏤文選諸書

宋程

顥

字伯淳弟頤字正叔河南人父珣守廣漢顥與頤皆隨侍嘗遊成都見治篋篋桶者

挾冊吟誦就視之則易也因論未濟顥兄弟爽然有悟後語袁滋曰易學在蜀滋入成都見賣醫薛

翁與語大悅蓋蔑叟
醬翁皆隱君子也

姚平仲

山西人靖康中為太尉金人圍成都平仲

初揭榜以觀察召之不出淳熙
間人於丈人山見之年已百餘

宋汝為

豐縣人建炎初呂頤浩使致書劉豫遇烏

南北議合秦檜忌汝為言金人機事將械送金汝
為變姓名徒走入蜀青城山而卒有忠嘉集一卷

安世通

陝西人隱居青城山中吳曦反乃獻書於
成都帥楊輔勸其舉義言甚深切輔未能

從遂東如江陵請吳獵討之及曦敗
獵使蜀蜀士爭推重世通獵優禮之

明鄭彥文

蔚州人仕元為萬戶入蜀居彭城因家焉
明平蜀彥文率土官首先歸附授貴州宣

慰使洪武六年調潼川知州未幾仍改宣慰使從征雲南有功進工部侍郎卒於官

王

紳

金華人待制祿之仲子洪武間任成都府訓導父使元梁王為其所殺藁葬雲南紳

冒險往求遺骨歸
蜀獻王甚重之

宋

濂

字景濂浦江人明初仕至學士上欲俾叅大政固辭濂素不勝杯酌嘗與內宴上强

之至三觴行不成步上親賦楚辭三章以賜仍命侍臣咸賦醉學士歌且曰俾後世知朕君臣樂若此也濂既司制作之柄文章輝燦求者集門日本得濂潛溪集鏤板國中高麗安南使者請文以百金為獻卻不受平居布衣蔬食無異貧士自少至老未嘗一日廢書及致仕歸青蘿山閉戶纂述洪武十三年濂孫慎以罪被劾安置濂於茂州子瓚隨侍入蜀間關萬里濂卒於夔而瓚亦歿瓚之從

子懌以孤童治喪蜀王夙欽濂為名儒碩德遂移柩於成都葬之

方孝孺

字希直寧海人蜀獻王椿建國成都聘孝孺為世子傅表其居曰正學以風蜀人累

官翰林承旨文皇靖難命草詔不屈死

嚴安

海寧人宋濂甥也任戶部主事因宋慎坐不法編戍茂州子茂博學善屬文茂州碑

刻皆出其手當路愛其文行優禮之其子孫遷居於灌口

陳以莊

字子臨貴州永寧衛舉人嘉靖丙辰知成都

有訟盜牛殺人者牛與屍俱不可踪跡以莊齋沐禱神祠感異夢依夢求之罪人即得屍與牛俱在後因採辦大木事落職盡俸資並鬻產以償竟不能歸然以莊經營木政頗久多得要領蜀中再值採辦當道數咨問萬厯初征都蠻巡撫

曾省吾聘參軍謀
凱還遂居成都

皇清黃

霖

字玉符浙江鄞縣人性嗜學通經濟遨遊江湖至成都慕浣花勝概遂卜居焉著有

山鷄集四卷蜀
紀畧二十四卷

重慶府

唐長孫無忌

洛陽人性通悟與褚遂良同受太宗顧命悉心奉國有蹇蹇匪躬之風高宗欲

廢后立武昭儀無忌立爭之許敬宗揣合武氏意
陰令洛陽令上無忌變事詔削宗爵以揚州都督

安置黔
州卒

宋范

鎮

華陽人舉進士累官翰林學士論新法不
合以戶部侍郎致仕晚居江津卒葬長池

里後人賢之名具
邨曰范鎮邨云

程

頤 哲宗時擢崇政殿說書紹聖間削籍竄涪
州頤至州居北巖山注易傳所授皆為名

士涪人
崇杞之

王

充

順慶人遊黔南時黃庭堅謫於涪與充相
愛甚篤庭堅書曰南充王子美其質溫粹

久與之游見其誠心
而不疑循理而兢兢

李

仔

字任道梓州人黃庭堅與王觀復書云有
李仔任道者梓州人流寓江津二十餘年

言物行恆叅道
得要老成人也

尹

煇

洛陽人少師事程頤靖康初以薦召至京
師不欲畱賜號和靖處士金人入洛闔門

遇害煇死復甦劉豫屢以禮聘不從乃自商州奔閬紹興四年止於涪就頤注易北巖山關三畏齋

涪人多宗之

杜萃老

青神人子美十三世孫累官殿中侍御史後直顯謨閣知遂寧府晚居江津卒葬杜

邨虞允文過江津題其墓曰剛直御史

蘇過

東坡子以謫官徙居江津縣聖鍾里子孫因家焉其後裔蘇伯瑜者以賢名世

史用之

眉山人出處未詳崇德廟碑文乃其所撰立論純正典則又長壽鳳山之麓有石刻

讀書二大字傍識云端平三年鶴山赴召過樂溫為史子作其賢可知矣

劉彝

福州人累官直史館知桂州時禁與交人互市及交趾陷欽連等州彝坐貶官安置

隨州尋除名為
民編隸涪州

明馬文升

河南禹州人兵部侍郎忤太監汪直謫戍重慶衛直敗以公論起為吏部尚書卒諡

端肅

保寧府

漢嚴

遵

字君平臨邛人嘗居南部蘭登觀朝自觀發往蓬溪暮還宿觀中日以為常

唐鄭

谷

字守愚宜春人乾寧間為都官郎中後避亂入蜀寓巴州有雲臺編等集傳世

鄭

畋

勛陽人子凝清迎養於通江

羅

隱

字昭諫新淦人因亂入蜀隱居劍門往來劍綿之間吟咏猶有存者

宋孫知微

字思邈成都人嘗採藥至保寧有孫氏池亭故址石刻尚存

文彥博

介休人幼侍父監征閬州有道士異之曰公南極之精降為國之申甫遂號南極真

子

周惇頤

字茂叔道州人少為合州主簿嘗詣南部謁尚書左丞蒲宗孟宗孟與語移日嘆曰

天下有此人耶顧予所為內省尚疚對此乃如青天白日矣聞其未娶遂以妹歸之

李好義

秦州下邽人與兄好古俱寓閬中好義初為吳曦部將累擊敗金人有功及曦叛好

義結李貴楊巨源討斬之歷官中軍統制

順慶府

漢司馬相如

成都人僑居蓬州故宅存焉宅畔有琴臺後人立祠祀之

唐李白

彰明人周遊四方經宕渠地有詩

李淳風

知星象訪袁天綱於蜀曾寓宕渠

崔塗

字禮山光啓中進士善詩嘗避亂宕渠冲霄寺詩刻尚存

宋黎嵩

浮梁人建隆初入蜀居廣安其孫錞最名於世

蘇軾

眉山人熙寧中寓廣安山寺今名來蘇寺碑刻尚存

范正己

姑蘇人文正公第三子純禮之子在官奉法守節不撓抗章論事知無不言後值金

兵逼境徒步攜幼至蜀蓬州因家焉

何造

成都人徙居蓬州其子絳孫修甫曾孫格非相繼登第有三桂堂

元孔敬

宣聖五十六代孫元統中寓居於渠多詩文

張大悅

寶鷄人泰定初寓蓬倡義保障鄉閭後封咸安郡侯

張德潤

大悅子襲封咸安郡侯首倡捐俸修聖廟及兩廡

明雪菴和尚

不知何許人靖難初至順慶愛善慶里山水奇絕里有杜景賢者知其非常

人為寺居之和尚朝夕讀易其中又嗜楚詞每袖一本登小舟急棹中流朗誦一葉輒投一葉於水

投已則哭哭已復誦終卷乃已衆莫測謂何或曰此松陽葉希賢也建文時曾為御史云

李鐸

光化人父智任蓬州學正因占籍永樂中舉孝廉授畧陽教諭嘗陳保釐十二策被

召入京待問一年復任著補
註顏子集並詩稿行於世

敘州府

宋黃庭堅

字魯直江西分寧人宋紹聖初貶涪州別駕移戎州安置蜀士從學者千計自號涪

翁

司馬子已

洛陽人溫公七世孫寓居戎州該通理學不事科舉以清白名世

元趙祖全

豫章人僑寓富順隱居讀書志行純潔鄉閭以為矜式善屬文凡郡邑碑刻皆出其

手

夔州府

楚宋

王

屈原弟子為楚大夫原沉汨羅王作招魂以悲其志後常居巫山又作高唐神女賦

託詞以諷襄王

漢揚

雄

字子雲成都人其父寓巫山生雄及長博學善屬文與司馬相如先後齊名論者謂

鍾十二峯之秀云

五代庾子輿

新野人性至孝其父守蜀卒喪過巴峽時瞿塘秋水漲不可行子輿叩天水為

退數十丈舟既過水復漲如初行人語曰灝瀕如牛本不通瞿塘水退為庾公在途有雙雀巢於舟

至家又巢於庭後仕為尚書郎

唐杜

甫

卜居成都叅嚴武軍事大厯初武卒蜀亂甫乃從江遊嘉戎次雲安居東屯在夔著

詩四百餘首論者謂子
美夔州以後詩益工云

宋冠準

萊州人太平興國初知巴東縣嘗賦詩云
野水無人渡孤舟盡日橫識者知其有宰

相器愛夔山水嘗以公暇徜徉其間又愛溪水清
冽取以烹茗後入相夔人建橋溪上名為相公橋

周惇頤

嘉祐元年至和歸聞龍昌洞之勝往遊焉遂道
汭峽至和歸聞龍昌洞之勝往遊焉遂道

於夔以至合州五年六月先生解食判出峽
東歸轉通判虔州則夔乃先生過化地也

邵雍

洛陽人遊雲
安築演易臺

明宋濂

累官翰林承旨安
置茂州卒於夔

余郁

淳安人為御史廉介公正以事謫夔築
竹坡以居澹然自適後卒子孫籍奉節

陳良翰

字景紳羅江人正德中由主事謫戍瞿塘

張

翀

字習之潼川人有風節嘉靖中以議大禮謫戍瞿塘

楊名

字公實遂寧人有文章氣節以直言忤旨謫戍瞿塘多所著咏嘗修大昌縣志又與

楊太史慎修省志號稱博洽云

寧遠府

唐元

軹

申州義陽人廉介有守以裴炎故流死舊州

雅州府

宋文

同

字與可潼川人以學行名操韻高潔嘗入雅州為王潛書濯纓序

直隸嘉定州

雍正十二年陞為府

周陸

通

卽楚狂接輿也春秋時王使使聘通於江南通大笑不應妻曰妾與先生射耕而食

紡績而衣據義而動樂亦足矣今受人重祿乘人良駟食人醲肥將何以待之通曰吾未許其聘也妻又曰君命不從非忠也不如去之遂以通變易姓名入蜀我眉山隱焉

漢竇

誼

居蜀之我眉縣放浪不羈月夜子規啼竹上誼曰竹裂吾可歸我峯是夕竹裂黎明

遁於我峯武帝三徵不起

揚

雄

西漢末隱居捷為有揚雄山

晉郭

璞

字景純聞喜人入蜀寓居嘉州烏尤山註爾雅洗墨山中魚吞墨水至今有烏頭魚

唐李

白

讀書於錦岡黃庭堅建太白亭於山之絕頂有登我眉及平羌江等詩

宋蘇

軾

讀書於嘉州有東坡書院至今以蘇稽名鄉人嘗拾其遺硯

程公望

寓居白厓山註易蘇文公嘗攜二子從之授業

黃庭堅

謫戎州寓居嘉州後居涪翁亭遺址尚存

邵伯溫

洛陽人父康節嘗曰世亂蜀可居及宣和末伯溫使蜀盡室以行家於嘉州得免於

難今隄為紫雲城乃伯溫故業也

晁公武

字子正澶州人靖康末避亂入蜀紹興中舉進士調榮州司戶後知成都府累官敷

文閣直學士吏部侍郎卒葬嘉定之符文鄉

劉甲

其先東光人宋元祐宰相摯之後父著為成都漕司墓葬龍游因家焉甲中淳熙初

進士累官興元府利東安撫使吳曦反以大義拒之召赴行在遷寶謨閣直學士白晝所為夜必書之名曰自臨有奏議十卷卒諡清惠

張孝芳

楚人號滄湖嘗行部至夾江見山水之美卜築焉楊仲修謂滄湖先生員廟廊器有

丘壑資無烟火語
當世人流第一

明韓懋

號飛霞道士博極羣書善為詩歌遊京師大學士楊公禮重之聞於武宗召見與語

大悅賜建飛霞宮後乞還飛眉寓嘉州士大夫為買行窩於錦江之畔

直隸眉州

宋黃庭堅

神宗時謫居戎州嘗曰安得奇士盡刻杜甫兩川詩使大雅之音復振三巴之耳哉

巴人楊素遂造請庭堅書石刻之作堂於南郭即八景之一也蘇軾為之記

直隸邛州

漢司馬相如

事景帝為武騎常侍因病免歸寓臨邛與邑令王吉善富人卓王孫為具召之

時卓氏女文君新寡好音相如鼓琴挑之文君夜奔武帝時以詞賦得幸拜中郎建節使蜀太守以下郊迎縣令負弩矢先驅蜀人榮之

宋劉

環

曹州人通判邛州因家焉八世同居和睦不替平生所薦拔幾百人多知名士

直隸潼川州

雍正十二年陞為府

唐杜甫

嘗避兵寓潼川故有四載客蜀郡一年居梓州之句

劉蛻

字復愚長沙人咸通間官左拾遺懿宗欲調令狐高為左拾遺蛻言高無家法以布

衣行相公之權高父絢為子訴寃貶蛻山陽令寓居潼川年老瘞文於南山刻石曰文冢銘曰文乎

文乎有鬼神乎風水為貞將利其子孫乎

鄭思毅

南昌人流寓安岳當路薦之遂攝學士

李洞

字才江諸王之孫居雍州以明經稱後避朱泚之亂入蜀居普州大雲山鑿石為洞

讀易其中嘗師事賈島鑄像事之有詩一卷賈島集句讀一卷行世

吳肇

不知何許人僖宗廣明間扈從入蜀為鎮國大將軍食邑中江子孫遂家焉

孫樵

字可之關東人入蜀寓遂寧著有經緯集三卷

五代馮涓

信都進士唐昭宗時為眉州刺史其子羣玉為山陽令後避江淮之亂棄官寓遂寧

時王建議稱帝涓獨獻議請以蜀王稱制建不從涓杜戶不出

多岳

天彭人蜀孟昶遣使徵之不就潛入普州寓居鐵峯教授生徒門多名士卒葬鳳凰

山

元晏昇道

江西人少通經術延祐初寓普州掘地得古鴈塔碑遂率同寓廬興祖芟草萊創文

廟士類至今感之

明王德成

武進人洪武中編戊秋林攜子九臯九齡同行遂定籍焉後五世同居積善好施人

多頌之今有一
樂堂集行世

直隸瀘州

宋唐庚

字子西丹稜人徙居瀘之安遠門號魯國先生有文集行世子文若早以文名有遜

安集

劉霖

永川人徙居瀘州安撫使梅應春殺判官季丁孫推官唐奎瑞以城叛降於元霖詣

合州說張珪復瀘珪未許霖願以身質珪乃決軍至城下夜四鼓先遣人梯城斬關舉火兵入城巷

戰殺應春遂復瀘州珪薦霖知南平軍未幾卒於兵

石正行

眉州人徙居江安宋淳熙中登進士力學不倦尤工於書得黃庭堅筆法自號笑齋

有文集曰
毫芒集

直隸茂州

明呂

經

字道夫陝西寧州人進士授吏科都給事中
以論潼關鎮守中官謫蒲州判嘉靖初

召復原官歷副都御史巡撫
遼東後以邊事謫戍茂州衛

王元正

陝西盤厓人正德辛未進士仕為翰林檢
討初號三溪嘉靖間以議禮謫戍茂州衛

前在京繫獄時有玉壘山之夢遂改號玉壘後過
玉山嘆曰今何至此耶遂徘徊不去兵憲孫公卽
於玉壘山下築室置之命曰玉壘
行寓元正寄興詩酒寓止晏如

直隸達州

晉郭璞

璞

寓達州有暗渡渡人人莫知也

唐李

白

大歷間寓達州有白雲寺詩刻於懸巖間

白居易

字樂天太原人貶忠州刺史嘗寓達州與元稹往來倡和時號元白而居易人品為

優

宋謝昇

資州人父立為達州推官因家焉以上書救鄒浩權貴斥為邪黨

李宗吉

不知何許人寓居達州家饒於財喜周惠人歲正旦作苞苴以濟貧乏

石砭安撫司

唐李

白

玄宗時流夜郎蔡寬夫詩話白從永王璘世頗疑之觀其書懷詩云僕臥廬山頂餐

霞漱瑤泉半夜水軍來潯陽滿旌旃空名適自誤
迫脅上樓船徒賜五百金棄之若浮烟辭官不受
賞翻謫夜郎天則
白豈從璘者哉

四川通志卷三十八之二

欽定四庫全書

四川通志卷三十八之三

僊釋

蜀自李耳留跡普賢過化其有僊釋也由來舊矣
厥後祖而述之代不乏人咸謂可以長生久視感
通利濟之不爽而執拘墟之見者又必欲盡廢其
說夫佛老之教主於虛無涉於因果其與易之何
思何慮書之福善禍淫畧相彷彿故孟氏言歸斯

受之昌黎言墨名儒行則夫存其姓名紀其實
正所以因勢利導使後之宗其教者就所明而漸
通於經常之大義也作僊釋志

成都府

夏李八百

蜀人初居筠陽之五龍岡歷夏商周年八
百歲一云動則行八百里時人因號李八

百或隱山林或居廛市又修煉於華林山石室丹
成還蜀中周穆王時居金堂山號紫陽真君其後

遂得仙封
妙應真人

周老子

河南歸德府苦縣人為周柱下史得長生
術嘗駕青牛度函谷關為關令尹喜著道

德經五千言曰千日之外求我於蜀中青羊之肆至期果至投喜玉冊金文賜以元始先生之號

杜宇

古蜀主蜀嘗大水宇率居民避長平山後鼃靈開峽治水人得陸處宇禪位與靈自

居西山得道上昇時適二月子鵲鳥鳴故蜀人悲思曰吾望帝也因呼為杜鵑云

漢費長房

東漢時為市掾從壺公學仙後辭歸與一竹杖曰騎此任所之又作符曰以此主地

上鬼神乘杖須臾來歸自謂去家旬日實已十餘年矣投杖葛陂中迴視則化龍矣葛陂今龍池寺

張道陵

修真艷陽洞辟穀煉丹後羽化人呼為豢陽仙人

李常在

蜀郡人少治道術居民累世見之初有二男一女皆已嫁娶乃去止二弟子隨之後

俱以青竹杖度其身二弟子歸家置杖臥牀其父母見兒尸在牀各泣而埋之復有人於郫縣逢二

弟子仍隨常在行附書到家其父母發棺視之惟見青竹杖而已常在又別娶婦其子往尋之常在曰吾兒欲來見我我法不得見兒兒泣而別去

折象

廣漢人少學黃老師事東平先生家世豐裕以為多藏必厚亡散千金以賑貧苦或

諫之象曰竇子文有云我之施物乃逃禍非邀福也智者咸服其言後自剋期七日尸解如蟬蛻焉

晉范

友

字子元涪陵人隱居西山蜀人敬之號曰長生惠帝時李雄攻成都百姓皆保險自

守長生亦率千餘家依青城山後雄得成都以長生有道欲迎為主長生固辭乃拜為丞相下令曰為國之道得賢則興吾得賢矣尊曰范賢於前邨築館為長生稅駕之所拜進太師西山侯不受

歸青城山後仙去

梁尚

圓

廣漢人自少出家以術救物梁武陵王紀宮中多鬼圓曰何以敢入王宮可聽我一

言於是諸鬼合掌圓即發咒鬼皆失所在武帝聞之大加獎賞

隋劉

珍

什邡人開皇中居安樂山忽取所藏經及鐘磬封於石室曰後六十年當有聖君取

之且曰吾功行已成四月之望當上昇屆期珍果冲舉修至長安見隋文帝自言飛昇事帝未信遣使訪之悉符所言遂為建二觀後唐高宗時遣使取經並鐘磬以進珍言果驗宋治平中賜額延真

唐無相禪師

益州人住成都淨因寺

華亭船子和尚

住淨衆寺

王

柯

字野山青城人母丁氏夢大星照身生柯幼而穎悟長而仁慈見老弱孤貧者惻然

哀之每大雪時施粒食以濟禽鳥嘗遇至人授以丹訣乃居洞中修煉歷年無成昂忽破丹悉化為金後上西峯遇道士煉丹柯乃助其薪炭奉事三年不怠道士嘉其誠授以祕訣丹成分遺柯服之身輕門側有柏騰身而舉已在樹杪考其尸解時乃在高宗儀鳳三年五月云

江西馬大師

號道一什邡人生而穎異牛行虎視引舌過鼻足下有二輪開元中事南

岳讓和尚祕授心印開法建陽臨川又至南康龔公山嘗言人各信自心是佛此心即是佛心又謂一切法皆是佛法諸法即是解脫解脫者卽是真如諸法不出於真如行住坐臥悉是不思議後於貞元中圓寂壽八十元和中追諡大寂禪師

羅公遠

彭州九隴縣人修道於澧沅常往來青城羅川間開元中因遊鄂州刺史園亭刺史

問何來答云適見守江龍來此刺史未信曰須令
見其形曰請俟後日及期刺史與郡人皆至見一
白龍於江心頭與雲連食頃方隱刺史具聞明皇
召見每問無不稱旨嘗召公遠與葉法善金剛二
藏試法而公遠嘗勝尤善自隱上欲傳其術公遠
曰陛下玉書金簡已格九清豈可以四海之尊輕
徇小術耶若盡臣術必懷璽入民間困於魚腹也
上不悟怒斬之後有使自蜀還公遠謂使曰吾晉
成帝咸和年間入蜀棲修林泉聞天子好道而來
又謂人間腑臟策血充積三田未虛六氣未潔請
以十年而授上如何遂殺我耶然得道之人形氣
混合豈能以世俗兵力為害因出一書謂使曰可
以此達上上必悟焉仍以蜀當歸為贈驗不誣矣
及明皇幸蜀迎公遠於劍門至成都拂衣而去世
傳公遠於蜀九仙臺上昇
彭漢之人至今立像祀之

傅仙宗

長安人父倫為資陽令宗性沈默好道有神人告以修真地遂乘青驪赴平岡山隱

焉開元間詔赴闕經利州桔柏江除水害利人祠祀之已而至都應對稱旨優賜後上問卿何道致此對曰守以恬淡行以簡易耳又問金丹曰惠及民物即長生也上大悅久之還山詔修葺舊觀賜額為真應觀乾道二年沐浴登榻而逝邑人王念還自成都見其乘青驪於簡州道上中丞宋渾為撰碑焉

阿世多尊者

天竺人唐時入中國止灌口靈崖山常令白牛下山募糧取水神異變幻

難測今靈崖有石刻像存

德山宣鑒禪師

簡州周氏子少年精究律藏於性相諸經無不貫通聞南方禪席咸

行師氣不平出蜀往謁龍潭至法堂曰久嚮龍潭及乎到來潭又不見龍又不現潭引身曰子親到龍潭師無語遂棲止焉一夕侍次潭曰何不出去師出却回曰外面黑潭點紙引燭度與師師擬接潭復吹滅師於此大悟咸通六年壽八十四卒師傳其法於雪峯存存後分法眼雲川二宗

徐佐卿

明皇九日獵沙苑射中飛鶴帶矢飛去益州道觀有道士徐佐卿寄寓是日自外持

一箭歸曰吾為飛矢所傷已無恙因挂箭於壁書其月日且云後十年箭主至此付之後明皇幸蜀至觀中乃見箭

悟達國師

居彭州九龍山至德寺作慈悲水懺李商隱嘗師事之

李班

蜀人得黃石公丹道改名棲真號太虛詣武夷山潛修七月歸經龍虎山先夕雪壇

有夢真人者時早禱弗應次日班至其處衆弗知也夢者指之羣請禱雨應時霑沛後至真州玉虛菴以道授張紫璫囑曰金丹宜潛修大道當人授尋歸青城山以九月九日上昇

了覺禪師

京兆人得法於洞山侂師初入湖南至洞山見堂僧問淨名大士入不二法門

旨趣何如曰山僧未敢舉明又問若是則事理不分答云扁舟已過洞庭湖師勦成都昭覺寺

五代神和子

姓屈突名無為五代時人張詠常遊京師於封丘門逆旅過一道士與飲至醉

詠曰不知姓名異日何以相識道士曰我神和子也異日見子於成都耳後詠守成都始思其言嘗物色之弗得後於天慶觀院堂壁上畫一道人肖逆旅所見視其題曰神和子詠悵然自失

昭覺圓悟勤禪師

彭州駱氏子得法五祖示衆云通身是眼見不到通身是耳聞

勅封明

宗真覺禪師
致祭一次

本朝雍正十一年
併五色舍利無數塔在昭覺寺側

不及通身是口說不著通身是心鑑不出通身即
且置或若無眼作麼生見無耳作麼生聞無口作
麼生說無心作麼生鑑若向這裏撥得一線路便
與古佛同參師卒於紹興五年茶毗時舌齒不壞

元艷都道士

未詳何許人元大德戊戌棲隱雪峯山
乙卯季冬召集道友曰吾化矣大道坦

然皎如日月雖由人弘豈隨人往諸生宜遵道而
行毋令半塗而廢偈曰朴菴寄住有年東西南北
依然裏面渾無一物只有玄文數篇今日草茅朽
腐須要改換棟椽眼底風波大惡不容久住山巔
選得幽居去處和軀
移上大天端坐而逝

明張三丰

不知何許人洪武中入蜀僑寓環衛姜指揮家寒暑惟一蓆笠甚大雖小戶出入

不礙繫鐵線條極工綴朝夕居一磐石上嘗取梅枝插土卽生花皆下垂故成都昔年猶遺照水梅種焉永樂中游內江寓明玉道人冢詭云龐姓微示以異嘗履極險不墜涉水無少濡明玉善符咒多奇驗欲授三丰三丰笑曰我以道奉公公乃以法授我耶乃作道法會同疏一通畀之居歲餘胡深物色之遂同玉見胡後又往來義眉山中或曰天目人名君實字鉉一

懷空

學道玉屏山明永樂中欽賜講經寶帳有語錄行於世里人建寺置塔塔奉具遺軀

後寺焚毀獨塔軀如故

繡枕

灌縣導江人明初以處女修証圓寂肉身至今存人號繡枕觀音遠近祈嗣者輒應

譚子

家天池山側生而穎悟一日行池上歸辭父母曰今日遇吾師當隨去遂不見父母

哀思作室池上望而招之後數年歸省尋去里人為祠祀之故又名天池曰譚子池

余喜巖

延安人性資朴古往大清宮年踰八十永樂五年三月二十六日更衣焚香盤跼而

坐曰來由此門去由此路一脚不失回頭卽悟鼻垂雙柱旬日顏色不改

智中國師

彭縣人也生有異相年十二即禮月光禪師惠心清修苦行晝夜不息後惠心

授松潘都綱師隨去尋代其職時番夷叛服不常師居邊撫化番夷莫不投伏天順間累加封國師仍賜勅誥降銀印師在邊四十餘年化行功著成化二年年踰七十詔歸彌陀庵優老焉

楊汝真

揚州人自幼刻苦修全真之道後遇異人授以奧理遠遊於彭來往葛仙陽平二觀

蜀藩間其道嘗致敬焉壽一百二十一歲於丹景山尸解

赤脚

姓金亳州人由秦隴來苦行絕火食赤足不襪近五十年至灌縣修靈崖寺路行叱

虎虎即

遠去

王勅

字嘉訏號雲芝弘治中督學四川能前知休咎嘗焚雲母石為糧張鶴鳴有傳

吳進寶

成都道士弘治中嘗遊新繁賂本隆家夜有盜數十人至舉家驚惶寶戒之曰無恐

為我取草來作小園數十遂啓門盜入寶擲園羣盜如縛不能動哀泣求解寶令本隆以酒肉賚之

盜叩謝而去又嘗夏夜宿雷氏碾中近水多蚊寶以手畫碾中為界禁之至今無蚊在縣東郭外

周仙葫

名子興成都人居五塊石一日遇道士李丹陽於青羊宮因師事之丹陽每至子興

家必索食達旦不醉人莫測其所以且授以酒方
釀成香微數家後人效其方多不驗與家架上植
藥葫蘆丹陽手挽一結於細腰處如出生成遂摘
而藏之數年丹陽辭去與治具欸之臨行納熟肉
一盤於袖而去明年有自楚歸者云某月日遇丹
陽於延聖坊登樓共飯出袖中熟肉曰此周君贈
我物也與計其日時甫踰刻耳因悔不與仙去乃
取丹陽所遺書讀之獨臥一小室久之棄家佩葫
蘆往尋丹陽徧歷湘
湖間竟莫知所終

劉從儉

新繁人嘗訓蒙有道士授以書從儉讀不
釋手諸童蒙荒漸去其婦奪書投之火儉

隨入火取書毛髮無損自是如狂不
家宿人或以鵝酒試之笑而不飲

明本

漢州人少育於姊夫高晟家伐薪爨一日
載薪山中驢不行怒砍其耳血流被地心

卽悔悟遂祝髮為僧入什邡高山寺安鉢功行極苦坐化之日人有自鑒華山來者見本隻履入山云夫一履於禪榻下可令吾徒寄送見者至寺方知其已化云

本來

崇慶州人進士張某之子避難蘆山削髮為僧一日說法有將校闖入請以射為說

師卽於座應聲曰射得中是爾的慈悲

僧德愛

自號印心華陽人七歲出家聰慧好道通儒佛兼知醫遇病輒施藥救之壬子歲荒

飯僧及流民活者甚衆晚年歸刹止靜棲禪臨終西向說偈而逝是夕紅光竟夜不散

無遐

邨不知何許人居九峯山絕頂修行時往來邨落中見邨民馬忠女甫週歲有病以破

布繡餌之立愈又曰此女當貴後適趙姓果封恭人嘗至縣詣邊氏家一徒羨其侈麗曰汝樂之何

不遂來此後三日徒死邊氏舉子哭不食乳師往探摩其頂曰既來何須哭耶子遂輟哭一日語弟子治齋邀諸僧作別諸僧至舉齋一笑而逝

妙琴

字無絃華陽人母高氏有娠每見異徵生而姿貌奇古善詩工書畫里人得一紙珍

重如寶入楚又以畫牛得名稱牛和尚還蜀住草堂構室椳東有梅萼千株畫梅入妙自號梅居老人萬歷九年跌坐道偈而終

蝻蟲子

不知何許人隆萬間來成都獨處青羊樓足有惡瘡臭不可聞然四體溫粹如玉猶

然童身無冬夏跣足敝衣時行市中市中無賴率小兒呼噪之有以竹刺其膚石擊其足者但笑曰蝻蟲子人因以為名見人則索酒與餅飲食之亦不謝或取草木之不可食者與之亦輒食好事者

為製新衣履旋為羣丐所奪畧不為意時馮方伯
成能偶遇而叩之耳語移時既而曰公可歸矣馮
逡巡未決忽以疾卒人
始異之後竟不知所終

明

采

崇慶州人少剃度為僧及長精止觀法門
不立文字萬厯四十五年示寂其夜僧徒

百許人見有紫氣投西南去有偈云念滅滅
亦滅更有何不滅本來原無說皎月當空徹

彭

成

新都人少業農長齋誦佛出語無倫次人
目為癡萬厯己亥九月忽語人曰吾將大

化幸以薪油助我衆笑之求不已漸有施者得油
則飲新則負至河濱疊而成樓又焚鬚髮搗飯作

大念珠二十四以篋貫之解香向四方膜拜拜畢
身坐柴樓火從香起持飯粒念佛不動端然而燼

萬

竹

名紹乾號一清後更號萬竹性恬淡篤學
葺茅我山雪巖僅可容膝茹菜三年神氣

和暢還成都與道友犀泉結廬百花潭上叅究心
宗一日幡然若醒嚮道甚力入南都講肆說法聽
者如堵復挂錫五臺刺血研金書法華九載萬歷
初入燕京栖普賢庵刊行彌陀箋註講演諸經後
還成都蜀主造講堂於浣花溪側
居之一日登堂集衆端坐而逝

皇清海

明

號破山梁山人天童悟法嗣第三人也嘗
勸賊帥李鶴子勿多殺人賊以羊豕進曰
若食此吾當封刃破山曰老僧為百姓生靈忍惜
如來一戒手遂嘗數嚙賊為止殺識者比之誌公
啖鵲摩什
吞針云

通醉

號丈雪內江人破山弟子蜀禪教皆祖破
山故丈雪演化於昭覺寺門徒甚盛年八

十餘示寂住持弟子
佛寬即其從子

顛和尚

長安人蹤跡詭異蜀梟某迎之成都禮拜甚恭而顛往往面斥之言無忌憚嘗食犬

肉帽簷插花一枝引羣丐遊行市中入昭覺寺見大雪禪師詆嘲不屑禪師頗敬憚焉一旦騎馬出城數里語廢吏曰吾歸矣竟舍騎徒步去梟追贖不受往來秦蜀棧中所至輒畫達摩像施人歸至長安數日遂坐化

張氏

溫江人未笄而娠父疑之棄逐于外女剖腸示父內俱經書事聞賜建女仙觀在治

北邑人上巳日常遊此

石穴僧

不知何許人夷臥成都山中石穴內二十餘年不起亦不飲食當臥處痕跡宛然山

中樵牧習見之就問不答一日有士子於此山遇驛道人云此山有六祖應化之否士子即詣僧禮

拜云師六祖耶久之張目曰莫信鼻
道人亂道明日再過之不復見矣

重慶府

漢王方平

棄官學道寓太尉陳統家忽然尸解
棲真平都山魏青龍初白日昇天

陰長生

延光初從馬明王求仙乃取太清神丹
經授之初居青城後於平都山上昇

晉淨業

石照人姓文少業屠有羊既乳將殺之二
黑銜刃伏門業感歎棄家為僧忽大悟作

頌曰昨日羅刹心今日菩薩
面羅刹與菩薩不隔一條線

唐蘭沖虛

涪州人居于祖師觀神龍
乙巳秋一夕乘雲而昇

黃萬祐

未詳何許人修道於黔南無人之境累世
常在每三五十年一出嘗賣藥成都言灾

禍神驗王建禮事之問其服食皆秘而不言問其
齒則曰吾只記夜郎侯王蜀之歲蠶叢氏都郫之
年時被請出烏兔交馳花開木落竟不知其甲子
矣一日南望嘉州曰捷為之地何其炎炎已而嘉
州市肆果為瓦礫後
辭建歸山固畱不聽

爾朱真人

名通微號歸元子其先出元魏爾朱族
遇異人得道唐末遂落魄成都市中嘗

於江濱取白石投水衆莫測後自果至合賣丹於
市價十二萬刺史召問其直更增十倍以其反覆
咸以蔑籠棄諸江至涪州漁人石
姓者得之因授以丹二人俱仙去

王帽子

出入關闡為人修敝冠號王帽子暮則臥
於涪州天慶觀一夕尸解而去道士為葬

之月餘自果山
貽書致謝之

韋

昉

蜀人夜渡涪陵江忽遇龍女遣騎迎入宮後昉登第十年知簡州龍女復遺書相迎

勅命昉充北海水師

宋宗

璉

石照人姓董住潭州大瀉山有僧過其家指燈示之曰燈照汝耶汝照燈耶答曰燈

亦不照我我亦不照燈扁其室曰窮谷劉錡鎮荆南問窮谷何義璉曰心盡曰窮性疑曰谷隨嚮應聲不疾而速

顯嵩

銅梁人姓李住巴州之宣密院三十年足跡不出紹興間集衆告以將逝作頌曰八

十年中常浩浩宏開肆貨摩尼寶也無一箇共商量不是山僧收銷早端坐而寂

徐神翁

常居樂溫之北真觀相傳神翁於此飛昇去今觀之右有飛仙臺仙人跡尚存後人

有仙翁去後畱踪跡丹竈沈
沈瑣翠烟之句今題咏甚多

趙覺

未詳何許人修煉於合州之東山宋嘉祐中冲舉而去今山頂有飛龍觀石竇丹井

井不盈尺常竭其水可愈疾人每來取則以淨巾覆井上默禱少頃水自滿又有禮斗臺今石上衣

佩履跡
見存

石頭和尚

號四祖師合州人自幼入景德寺為僧有戒行因鑿石出火遂大悟作偈曰是

石頭和尚咬嚼不入打破虛空露些子迹復白州守開釣魚山建護國寺自斲石二十四片為龕全

身入門自掩端居而逝有草庵歌其末曰老僧不知輪甲子一葉落知天下秋

真容

榮昌人姓徐氏自幼為觀音寺僧禮佛守戒後卒生於壁山魏伯祿家年十七不能

言一日謂其家曰吾生前故觀音寺僧今當復還
歸寺乃譚生前事皆不爽僧衆往謁皆知其名邑
令周俊密使人往觀容先令徒一人具茶往
候于塗人皆異之號為神僧一日跏趺而化

明楊常符

豫章人雲游瀛山首創白雲觀金牛穿逕
玉井開基連理呈祥甘霖應禱迄今山以

仙名道因地
顯代有異人

楊大明

常符首座賦性樸魯精於修
煉一日拜辭師友結坐而化

張太虛

貴州人瀛山全真披虎皮行乞人呼張虎
皮終日嬉戲與物無忤蓋蘇門先生一流

人也

赤陽子

不知何許人黔江縣西烏鵲觀有道士題
詩云萬里長江渺碧霞彤雲飛映到烏鵲

崖寒木冷仙裳別水秀山奇景物華游子樓頭傾
竹葉牧童牛背落梅花興來一覽乾坤濶笑傲壺
天歲月賒後書赤
陽子題墨跡透壁

喻常清

邑里無考寓黔江千戶陳綱家三年綱敬
禮之常入八面山採藥歸寓燒煉一日丹

成欲度綱綱適他往謂其僕曰吾在此三載矣汝
主遇我厚無以謝汝主因畱蒟蘆一枚草履一隻
以作後驗逾年汝主有難時二物雖微可以解脫
綱歸而常清已去僕具以告綱異之未幾有自渝
郡來者亦見常清云然考其日月皆同乃始知其
為僊也綱後果為人所訟幾致重譴因憶前蒟蘆
草履遂獻中丞林其中竟脫綱於難
而中丞攜蒟蘆及履入山修道焉

胡老道

黔江人修養有年年一百三十歲貌若少
壯好事者以女色試之畧不為動後尸解

去

寶崖

涪州人幼寡言不嬉戲棄家爲僧以布裹五指燒之曰信佛如此可也人以為風疾

何不治之答曰身在空耳四大五肢復何有耶投火滅身而心不壞

雪峯和尚

黔江人有道行禱雨輒應後坐化人咸稱為善知識

火傳居士

姓沈氏名復賢塾江人幼喜老莊書嘉靖時為楚雄司李耿介有執法難移薑

桂性媚人不易殺人難之句後歸里築室東山之麓寒暑誦華嚴不輟每遇夜月明即呼吸精華一

夕命置棺於堂薰沐端坐吟曰幸吾一副臭皮囊煩惱曾經幾萬場秋月一輪清徹骨翻然笙鶴白

雲鄉吟訖投於案仰臥而卒後有鄉人經三峽見小艇中一鶴髮翁吟云孫登發一嘯火傳接其音

孟鼓棹追之艇
條逐烟波而滅

尚陽子

不知其姓名寓居於塾江嘗就飲李長春家閱三年敬禮不倦時值除夕家乏鹽尚

陽子曰茲何難子第閉目隨余往便可得鹽長春從之耳畔颯颯惟聞風聲及開眼時身已在壓子崖邊矣又邀之渡江長春不敢行遂獨乘白羊渡龍舌灘而往頃卽回攜鹽若干兩付之曰足汝三年之用矣一揖而去長春果三年不苦淡食

秀崖和尚

法名興國塾江人邨中牧牛忽為僧萬厯間掛錫京師臥佛寺適青宮嬰疾醫

院呈方皆不效師進觀音水一盃服之立愈勅封護國禪師太子太保

陳五雲

黔江鷄足山人修煉於八面山每煉杏核丹以濟貧人皆稱為老僊與邑人湯瓊友

善崇禎十二年忽辭別瓊瓊叩其故曰黔邑將壞不可久居遂去明年寇圍城劫掠甚慘人始知其見也

皇清稽古靈

住綦江中峯寺年一百一十有五骨健神清不畏寒暑從遊者惟教以敦倫行善他

無所語康熙十九年呼衆升座說偈示寂

蒼桐

法名海華綦江儒家子棄儒入釋參悟屢年有語錄行世年八十餘步履如飛康熙

二十三年一日坐木牀微笑而逝

保寧府

漢張道陵

居閬中鶴鳴山煉丹修道感老君授以秘錄遂領弟子趙昇王長來雲臺山煉大丹

服之永壽二年自以功成道著乃於半崖躍入石壁中自崖頂而出因成兩洞崖上曰峻仙洞崖半曰平仙洞是年九月九日將諸祕籙玉冊玉印斬邪劒授長子衡乃與夫人雍氏登雲臺峯白日昇天年一百二十三歲

宋羅晏

閩中人兒時牧山下見二道人共捨牧觀之道人出囊中餅與之晏食已歸家覺腹中如燎發狂累日自是常飲水數日不一食預言禍福無不驗宋宣和中賜號靜應處士張浚嘗延至軍中晏曰相公勿恐明日賊退果然加號太和冲夷先生壽至百八十歲云

明蒲從善

江南人有道行祈禱治病符篆靈驗洪武十八年遊南畿受知於太祖

鄭本

昭化舉人至河北見雲端雙鶴聯翩而下及至則兩道人也因尾之二人顧問本跪

道所以牽挽不舍二人曰吾被汝窺破因授以修
煉法遂歸絕意進取棲隱山林年九十尚作小楷
無疾趺坐而逝
人以為尸解去

雪 凭

不知何許人正統景泰間與無際禪師為
友至廣元之天臺山喜具幽僻息心棲止

初雖不知文字久而成
覺著雪凭語錄傳於世

實 相

豫章人萬厯壬辰卓錫廣元之雪峯解文
字時游戲詩畫譜經典翻刻七百則公案

評唱若干卷達官士人多採
藏焉黃太史輝為作塔銘

曉 宗

昭化人遊南海三十年萬厯丙申歸居縣
之梵天院誦法華經禁步不出五載結

室於人頭山麓戊午秋集居人告以將去眾以為
他往懇留之曰未也嗣當辭謝茲山狼虎縱橫日

暮則人不敢出戶是夜諸人夢寐中俱聞叩門作謝聲達旦往視則跣趺逝矣鼻垂玉筋至膝遂作

塔以藏焉

順慶府

漢馮真

廣安州人馮緄子也修煉岳門山頂白日昇天

隋程太虛

西充人自幼學道精修勤苦隱居南岷山絕粒有二虎侍左右九井十三峯皆其修

煉處也一夕大風雨砌下得碧玉印人每乞符祈年印以與之輒獲豐稔唐元和中尸解後遷神於

元宮容貌不變宣宗命人求之過商山宿逆旅躡絕險有居第如公館青童引見一道士自稱程太

虛祖居西充且囑曰明歲君自蜀入南岷無忘我及至蜀視畫像與前見者無異宋賜號道濟大師

唐袁天綱

南充人居朱鳳山
修煉丹井尚存

爾朱通微

詳見
重慶

謝自然

南充人貞元中以女冠於金泉山
白日上昇萬目共覩韓退之有詩

葛由

蓬州人嘗乘木羊上綏
山隨者皆得道上昇

胡德元

蓬州人從孫太和修
煉千日雷偈上昇

宋張英

英宗初拜儀隴尹過采石江遇一女子姿
貌絕世謂曰五百年夙約與君當會於大

儀山英叱之至任幾半載日夕聞機聲一日率部
衆逐機聲而往行數里至大儀山一石洞門鑰宛
然門忽開前女出迎相攜而入洞門卽閉從吏哀
號忽二圓石自門隙出衆取歸中道不能舉邑人

建祠塑像各置一石於腹
至今有禱輒應廟曰永濟

圭峯禪師

蓬州人相傳鷲鷲山有井井側有巨人跡女履其跡而娠生師棄諸野馬牛避

弗踐鷲鷲以翼覆之母收以養及長奉佛於青蓮山講經於上青蓮湧出有八龍聽經今有八龍池

在馬

敘州府

魏劉真人

武帝時隱山中得道自平蓋山駕鶴入建州

唐預知和尚

大歷時有梵僧結庵於北巖六日諭其徒衆曰整治資糧衆請其故答曰今夕

當有暴客至以此待之既而盜至悉取糧去然竟夕不能出山遂舍之而遁見李文淵北巖記

宋彥室

輿地紀勝云太平興國觀相得山有異人紹興中王籍彥室嘗行山間遇道人歛語

以腹枵告歸道人笑以肘捫其腹者三彥室頓覺異常歸卽辟穀踰年復夢見道人啖以棗呼之過

溪彥室曰吾親尚在乃止

元張法真

自幼好道術延祐間往龍虎山受籙遇至人示以祕法既歸禳災疹治疫疾捷如影

響及卒鄉人立廟祀之有禱輒應

明羅天祐

漢州人來遊長寧市若顛若狂善言人得失嘗隱語書鄉榜封以寄人撒棘無不驗

者後入成都見司戶薛瑗於座上而化

王守中

泥溪司人自幼學仙於後山鑿洞調息十餘載一日尹蓬頭來訪遂引之去十八年

一日復歸家云來救兄死時兄已入棺命取出以水浸之復甦後兄仕滇二十餘年共仙去萬厯四十六年臘月十一日午時後山崩出仙人洞卽守中調息處

夔州府

蜀漢翟法言

雲陽人嘗詣棲霞宮採藥得道能召灑神見仙鑑

楊雲外

雲陽人與翟法言相繼得道於棲霞宮

張卞

梁山人按蟠龍洞碑云卞為蜀先王將因諫先王攻固陵不聽入山遇熊叟自稱鵠

夷授以丹訣修煉上昇

唐岑道願

江陵人隋末避亂隱名棲山草衣木食十有餘年不知所終

明果子

巫山秀峰寺僧辟穀食果因以為名人有疾病呪水服之立愈直指陳某右手病不

能舉咒水與飲卽痊主簿韓達有心疾呪水療之亦愈具樹碑以表其事焉

龍安府

唐竇子明

江油人為彰明主簿後棄官隱於竇坪未幾至圖山修道抵仙女橋見一女人磨針

因問之答曰鐵杵磨繡針功夫自然成遂感悟復歸圖山怡神養性三載白日昇天今塑像俱存

張真人

平武人隱天倉洞中都夏馬西峯於古山修煉聞之遠來欲訪以道真人先入洞遂

雷住閭中天旱禱雨有應事聞封康濟龍王

宋遊仙女

寶祐中有二仙女遊於小溪山人驟遇之冉冉升雲而去異香杳靄至今名其地為

仙女
鋪

元張羽士

至正間嘗師赤脚張神仙善行雷法祈雨輒應遇呂蓬頭授以黃白術遂以風魔醉

酒行歌顛狂
竟不知所終

明智慧菩薩

古城周曉師女生而不食葷好誦經年十九有議婚事輒自面壁經旬不起嘗

絕粒食柏葉成化五年促父母送至江利口白馬寺樓上自焚結跏坐滅歷暑不朽神靈顯異鄉人遂以沙築其身裝塑成像號智慧菩薩劍梓人爭事之最靈驗

空庵

彰明縣香火寺僧得悟禪宗每歲買藥以濟病者以穀粟飼鳥至千百下食環集肩

背善吟咏有語錄
至百有餘歲坐化

雅州府

漢理

真

俗姓吳從嶺表來種茶蒙頂殺化石為像其徒奉之號甘露大師水旱疾疫禱之輒

應宋淳熙十三年進士喻大中奏師功德及民孝宗賜號甘露普惠妙濟大師

峯

頂

號天涯大渡河人父鄭常道母孟氏漢元平七年六月從母頂誕生故名峯頂七歲

能言口生肉齒合掌白母住瓦屋山出家不知所終

唐爾朱真人

詳見重慶

宋張守虛

字無知鳳翔人嘗賣藥於梓州因訪友過金鷄遂棲真名山延禧觀後歸梓州號落

魄仙以九日龍昇

可正

字無礙俗姓彭壯歲入邛南且泉禪寺禮
天滄禪師之室滄默識其非常材遂令祝

髮為僧一夕頓悟暢明宗旨
後示寂名山縣之大目寺

禪慧

名山人屢舉不第元符間郡守呂由誠以
僧勅戲之即削髮明日住天寧寺長老叩

以佛法不許乘馬師曰文殊駕獅子普賢跨象王
新來一個佛騎馬也何妨其機敏類如此著有禪
慧語錄
行世

韜智

行脚僧工詩字至蘆山無衣履或以衣贈
之即口占曰未衣豈盡寒既衣豈盡煖寒

煖不在衣君
意如春轉

劉清

天全州人有辟穀導引術
能叱咤風雷禱雨輒應

無瑕

蘆山天主寺僧年九十餘說偈生化

陶道人

清溪人紹興間入獅子山採薪遇異人得道與王畫龍同時王每畫龍最神異然必

有所闕否則隨雷雨變化陶每見王輒以杖擊之曰此龍妖也後俱不知所終

甘常字

蘆山人人有疾求醫但加手摩其頂卽愈人以醫仙稱之壽及期頤一日大笑而逝

本宗

流寓蘆山削髮雲峯洞洞高雲際足不下山者數十年一日探奇又至一洞迷失道

餐柏葉七日遇樵夫引出卽建為靈源洞後入蒙頂為禪門善知識

直隸嘉定州

雍正十二年陞為府

古廣成子

黃帝嘗於藐眉宋皇觀就之問道今遺礎尚存古碑猶在

漢葛由

列仙傳綏山在峨眉山西南無極山上有桃羌人葛由居焉常牧羊賣桃一旦牽羊

入蜀城王侯貴人追之上綏山皆得仙故諺云得綏山一桃雖不得仙亦足以豪

瞿真人

名居字鶴子犍為人入峨眉山四十年得仙乘白龍還家於平岡治白日上昇

晉葛洪

句容人為求丹砂乞補勾漏令後入蜀取雄黃於武都山得之色如鷄冠喜曰吾丹

成矣至洪雅之花溪因居巖洞存神養氣道成白日昇天巖前影跡尚存

唐呂洞賓

居二峨山猪肝洞詩云教化先生特意來世人有眼不能開有人識我真名姓我是

終南呂秀才題之東嶽廟督學王勅識其仙筆令鑽一字墨透泥竹遂取去

慧持

遊峨眉山入滅於嘉州道左之古樹中至宋世風吹樹折頭髮蓋身指爪圍腰一匝

有司以聞取至都西僧總持擊金磬再拜遂出扣
之曰吾乃遠法師弟也總持再扣曰吾將陳畱入
定遂去

宋孫思邈

寓居九老仙人洞太宗嘗夢思邈乞雄黃
煉丹遣中使送至我眉山忽見一老人語

中使曰汝可置石上有朱書謝表一通
中使旋錄旋滅再物色之不可見矣

祖覺

俗姓楊嘉州人住我眉山中巖倡明佛法
學者雲集儒釋之書無所不讀作僧史一

百卷并華嚴經金
剛經集解行於世

皇甫坦

善醫藥宋高宗詔見問何以治身坦曰心
無為則身安人主無為則天下治引治顯

仁太后目疾立愈渥賞一無所受高宗書清靜二
字以賜隆興初入朝孝宗稱為先生而不名坦善

相嘗言京南帥李道中女必
母儀天下後果為光宗后

東汀和尚

嘉州人不執文字別有見解如所云諸
佛以一句演百千萬億句收百千萬億

句祇在一句祖師門下半句也無宋孝宗召對稱
旨帝注圓覺經命之作序一日往別禪友僧策策
問行日師曰水到渠成索紙書十二
月初九夜鷄鳴時九字如期而化

明萬世尊

一名義眉山山人巴陵楊一鵬見之囑曰三
十年後當見汝於淮上後楊開府淮安遣

僧寄書至發函得詩楊尊
失機被刑連呼好師傳云

直隸眉州

周彭祖

古陸終氏第三子錢鏗也自堯歷夏殷時
封於天彭周衰始浮遊四方晚入蜀抵武

陽家焉或云卽
論語所稱老彭

漢史通平

光武時自會稽來蜀詣義眉山謁天皇真人授以三一之法及五符訣遂居青神結

廬煉大丹成龍虎狀又廣
行陰德功滿白日昇天

唐楊昭慶

景雲中自京兆來眉志尚玄虛居青神遊
仙觀三十餘年感五嶽丈人希受真君授

以朱明龍文
遂得尸解

成無為

丹稜人開元間女道士幼而出家誓死不
嫁卜居龍鶴山下調形煉骨却粒茹芝年

踰五十昇仙而去棲
隱之處有龍洞遺跡

李煉師

眉山人天寶九載修道於桐柏山
中能禱雨以救民旱其應如響

可朋

丹稜人有詩名性好飲無以償酒債作詩酬之自號醉禿邑令歐陽迴納涼於寺是

歲暴旱而衆方羅列樽俎迴擊腰鼓以自適可朋見寺外耕者曝背烈日中因上田鼓詩以質迴迴覽之惻然遽命撤宴其詞曰農舍田頭鼓王孫筵上鼓擊鼓兮皆為鼓一何樂兮一何苦上有烈日下有焦土願天宮降之以雨令桑麻熟倉箱富不饑不寒上下一般遂雨著有詩千餘篇號玉壘集

張遠霄

眉山人見老人授竹弓一鐵彈一質錢三百千而張無新色老人曰吾彈能辟疫癘

宜寶而用之再見老人遂授以度世法熟視舉首見其目有重瞳從往白鶴山垂釣西湖峯上有異人曰此乃四目老人翁君之師也

寧遂忘授竹弓鐵彈時耶張大悟

牟羅漢

眉州人名安以廂兵隸卒如岷山陟上清坂忽遇髯者顧笑曰汝饑何不食柏子耶

摘子投其口顧髻者已不復見矣從此不火食大雪中庭有大甕貯水解衣就浴江水瀑漲舟不可行或戲指其笠曰乘此渡可乎年遂置笠水面跌坐其上亂流以濟人呼為牟羅漢云

宋陳太初

眉山人初與東坡同學於張易簡後東坡謫黃州有眉山道士陸惟中云有得道者

陳太初問之則同學者也又數年見東坡於惠州云太初已尸解矣

玉泉

俗姓王丹稜人依大力院出家元豐間張無盡奉使京西南路就謁之請開法於郢

州大揚言畢而逝人稱承皓禪師

心道

名常德丹稜徐氏子年三十剃度為僧出遊江淮抵舒之太平寺師事佛鑑得證道

果後遇賊亂其徒欲引之南去師曰學道以了生死何避之有賊至舉槩刺之血皆白乳賊衆驚怖

引席覆之而去

明張元羽

眉山入精於黃白之術遇仙欲度之元羽云九載遨遊掛鉢船十讀楞嚴不學仙

遂拂衣而去有元羽集行於世

李青霞

眉州李氏子歲歟父母棄之江流至青神漁人夫婦無子者網得之育十餘年隨瞽

史學琵琶至綿州高翰林家有道士與之論丹法李忽擊碎琵琶而求為道士徒許之遂徧遊名山歸綿卒葬於寶圖山閱數載眉州別駕尹姓者江西人方蒞任齋宿城隍廟問焚獻道士曰汝名曾天成乎道士瞿然曰小道名何先知曰吾來時有李青霞道士居吾郡言余必選眉州此吾鄉也城隍祠道士曾天成是吾徒也為我寄聲天成曰李師歿已數載且葬於綿何復遊人間世耶始知其

尸解云

直隸邛州

漢莫將軍

河南人遺其名文帝時征雲南駐節莫佛鎮山下見石山狀如蒼龍出洞遂鑿斷之

流血夜聞空中人語云將軍既認破此地能捨官出家後必成佛莫如其言於此修行竟成正果云

周馬成子

扶風人去家訪道遇黃蓋童子授以胎元鍊氣之法乃入邛之鶴鳴山復於石洞中

遇異人授以神丹曰氣為內丹藥為外丹今授子此丹服之當列高真成子遂白日昇天

橘中叟

邛州民家有橘樹霜後餘一大橘如斗剖視之有二叟身尺許鬚眉皓然相對奕棋

一叟曰橘中之樂不減商山但不得深根固蒂爾一叟於袖中出草根喫之化為一龍二叟共乘之

冉冉騰空而去

唐楊通幽

洪都人唐天寶間修道臨邛安祿山犯關

安明皇思慕貴妃命通幽招至貴妃魂白居易長恨歌臨邛道士洪都客能以精誠致魂魄即通幽也

宋王興

為蒲江主簿性淡泊好道一日於長秋山遇白玉壺引戴共駕祥雲昇天

明張三丰

洪武末入邛之鶴鳴山時石鶴復鳴人咸驚異居半載入天谷洞不出年已三百餘

歲矣

直隸潼川州

雍正十二年陞為府

漢張道陵

詳見保寧府

唐法真

梓潼人妙齡夙悟南遊見藥山道人次石嶺外大瀉會下清苦練行瀉深器之一日

問曰閣黎在此不曾問一轉語師曰教某向甚麼處下口瀉曰何不道如何是佛師作手勢掩瀉口瀉歎曰子真得其髓還蜀寄錫天彭山山有古樹圍四丈餘南開一門中間不假斤斧師因游息其中時人遂號為木庵禪師云

一

新

州治舊無鹽井一新遊蜀至此指其地鑿之鹽泉湧出因建寺奉其遺軀焉

宋陳搏

搏

安岳人生於崇龕鄉既長辭父母去學道或居毫為毫人或居洛為洛人或居華山

為華山人見一統志
今崇龕梨亦搏所植

王杞

字昌遇東川獄吏梓人也盡心獄事多陰德遇異人授以仙訣詩百篇深契易理大

中末舉家仙去
賜號保和道人

趙法應

別號有庵中江人幼著靈異年十五詣雲臺山結茅練習至十九歲畱偈云脫落一

貧道謫凡十有九記其歸去時在處重陽酒遂端坐化去其遺蛻歷宋元猶存望之如生詳見雲臺記

董仲

潼川人其詳不可考今城北有董仲書巖詩文尚存世傳以為仙云

呂陶

建中靖國時知梓州有客至賓次肅之甚恭或以問陶曰此呂洞賓也余自此去人

間事矣後
果傳仙去

明劉道明

初名昭安岳人自少居天慶觀終日默坐歷二十餘年遂知識緯由是名聞遠近永

樂間以星史之占召入時值六月命築壇祈雨三日果大雨上奇之卒年九十有九其他靈異多不可悉時人稱為劉神仙云

羅仙女

中江人少頗蒙父母煦之忽一旦開悟卽諳經義遂入僧寺談空說法了了無礙且

預知禍福人爭詢之未幾坐化去踰三年啟棺視之其面如生

覺壽

遂寧人明心性遊長安道上得遺金俟其主反之後歸適廣福井調息跏趺坐井上

鹽泉湧出永樂甲午邑久旱復登廣福山絕粒禱雨旬日果大澍年九十不知所終

福湛

號天淵楚人居蓬溪智林寺勤苦修行解悟空寂為時禪宗所著有天淵錄二卷及

辛有偶云七十七年一笑終倒騎木馬吼
西風我今脫殼飛騰去明月清風一樣同

無際

姓莫名了悟一號蠶骨安岳人居大竹黑
崖勤苦修行久之若有所得乃師古拙及

無念遂得釋氏之要既而卓錫道林四十餘年脫
胎離行時著靈異四方無賢愚咸嚮之正統間召
入勅為宗師登壇說戒觀聽如堵及卒
賜祭給傳還葬木門所著有語錄一卷

了用

姓張號雪機遂寧人少善應教偶聞人言
遂感悟靜坐數年深有所得印證於天淵

和尚嘗作山居詩有云傍樹修庵倚翠岑烟霞繚
繞白雲嶽愚痴自合棲泉壑潦倒何妨論古今怪
石溪邊塗去跡浮嵐巖下絕來痕始因人道藏幽
谷截斷攀援更莫尋年七十二卒其日彩霞繞寺

人咸
異之

直隸瀘州

唐胡 佯

道人容貌奇古美髯秀目唐末於江安縣東六里山峯絕頂修煉嘗適梓州見獄吏

王昌有陰德授以仙訣舉家白日上昇

明韓飛霞

州人具雋才為諸生制行高雅試不第遂棄儒服黃冠出遊遇異人授以仙術尋得

道名聞於朝正德間召見賜號抱一守正真人

直隸資州

明釋道慧

資州人與德陽令樊昂遇為方外交萬厯癸丑夏樊病甚因亢日夢帝命作桐柏山

神以書問之慧謂之曰諸業由心造諸果亦由心證帝命亦由心改公平日見地作麼生於此著念

樊又問病痛甚奈何曰提起主人公問誰為主曰覺痛者是曰四大解散痛亦不知誰為覺者慧曰覺原無痛痛亦非知知覺無痛痛痛即離豈待四大解散覺體無邊際四大浮漚耳樊大有省悟

直隸綿州

宋黃鹿真人

綿州馬氏女名道興七歲時遇異人授以鉛汞符篆要術及筭乃祖逼以聘事

堅辭夜與女奴攜杖策而去卜地修煉久之前異人復至授以黃白之術後四十年道成遇羣盜入庵劫之遂乘黃鹿騰空而去異香經日不散後人即其地建觀以崇祀焉

明江老軍

名添富綿州人嘗從軍遇異人授以修養要訣髮白反黑齒落復生一食丰米鄉人

每請禱雨必應暴風雨中屢日不動冬寒則剖冰而浴壽至九十有九尸解

雪庵樂靜禪師

安邑譚氏子嘉靖壬辰祝髮南叅還蜀嗣海藏住道峯院萬厯十一

年元旦索筆書偈曰只此漚泡幻影相隨六十餘年橫眠三界剎那無處顛倒人間皎然空花影絕見聞寂寂虛閒問取雪庵面目處處綠水青山書畢跏趺而逝

四川通志卷三十八之三

欽定四庫全書

四川通志卷三十八之四

祥異

景星慶雲盛世以此稱瑞堯水湯旱帝王不諱言
災故雖機祥之說史稱儒者不言然休徵咎徵實
關乎天道而亦人事係焉者也蜀中白雉祥麟嘉
禾瑞麥要皆和氣之所招至若民間偶有眚災在
修省者尤為加謹蓋五行關乎五事八體配乎八

卦善言天者固常有驗於人焉然則本堯典欽若之意念春秋感召之機天人之理不旣微而顯乎作祥異志

周敬王時萇弘死三年血化為碧數里內土皆青色顯王八年彗星見西方是時蜀開明王以珍玩報秦皆化為土武都山丈夫化為女子二十二年蜀王迎五女於秦至梓潼大蛇入穴五丁扯蛇山裂分為五嶺五丁五女俱死

赧王五年秦惠王使張儀城成都大龜出於江儀
因龜跡以成城

秦昭襄王時白虎為害自秦蜀巴漢皆患之

孝文王時灌口孽龍為患有二牛鬪於江心其一
不勝因奔潰害始息

始皇時有長人二十五丈見宕渠

漢高祖三年秋太白出西方有光數重

呂后七年地震羌道山傾江漢水溢後五年江漢

水又溢

文帝元年九月有星孛於西方

景帝二年十二月有星孛於西南三年春正月長星出於西方

武帝元封元年五月有星孛於東井又孛於三台
昭帝元平元年三月有流星大如月衆星皆隨西
行

宣帝地節元年春有星孛於西方去太白二丈

成帝建始三年十二月越嶲山傾河平三年春二月犍為地震山傾壅江水逆流元延元年秋七月有星孛於東井三年春正月岷山傾壅江三日江水竭

哀帝建平四年十二月白氣出西南從地上至天出參下貫天厠廣如疋布長十許丈十餘日方隱平帝元始元年春正月益州外夷獻白雉三年越嶲郡上言黃龍潛江中

光武帝建武元年夏四月龍出府殿前公孫述以
為瑞應遂稱皇帝號大成改元龍興

章帝時益州神馬出甘露降白鳥見

安帝延光三年夏四月閏中山傾四年冬十月越
騫山傾

桓帝建和三年秋七月梓潼山傾永壽元年夏巴
益郡山傾永康元年八月巴郡言黃龍見

獻帝建安元年越騫有男子變為女

齊武帝永明六年熒惑逆行入於太微

陳文帝天嘉元年九月癸丑彗星見長四丈芒指西南

隋煬帝大業中嘉州有蛟為害太守趙昱入水擒斬之

唐高祖武德元年彗星見於五車

高宗永徽六年嘉州民辛道護妻一產四男

武則天時松州雌鷄變為雄

中宗文明元年秋七月辛未夕彗星見於西方長
丈餘八月甲辰不見景龍元年十月壬午彗星見
於西方十一月甲寅不見

睿宗太極元年秋七月彗星出西方入太微

明皇開元三年彗星出於五車

代宗大厯八年彗星出於五車

武宗會昌四年春正月西方見白虹

宣宗大中二年彗星出於觜參

懿宗咸通元年秋七月白虹橫亘西方

昭宗天復元年五月丁酉至於己亥太白晝見經天在井度八月己亥西方有白雲如履底中出白氣如足練長五丈上衝天分為三彗頭下垂

後梁太祖乾化三年五月騶虞見壁山有二鹿隨之四年麟見昌州

後唐明宗天成二年十二月壬辰西南方有赤氣如火燄約三十里

後晉高祖天福六年九月彗出西方掃天市垣長丈餘

前蜀王建武成元年彗星見於鬼長丈餘永平二年

什邡獲銅牌上有六十二字建命嗣子更名元膺

字昌美符銅牌膺昌字為文誠之

後蜀孟昶廣政二年太白晝見蜀中大水

宋太祖建隆二年五月己丑歲星犯東井七年青城

王姓一產三男九年永康軍獻芝九莖乾德二年

秋七月己卯朔夜西方起蒼白氣長五十尺貫天
船五車參宿五年忠州火倉庫殆盡八年五月合
州巴川縣獻瑞麥

太宗太平興國元年冬十月渝州獻九穗禾八年
七月銅梁民楊彥魯獻一莖九穗禾雍熙四年有
犀自黔南入萬州民捕殺之獲其皮骨淳化元年
十二月流星出天關歷東井至大角墜地光芒四
照有聲二年永川民梁行良至道三年合州民蘇

福家並牛生雙犢黔州摩圍洞慶雲見石生鱗鬣
眞宗咸平元年八月涪州大風壞城舍大中祥符
元年秋七月黔州嘉州異畝合穗十二月黔州芝
草一莖十二枝若山峯狀三年昌州廨柱生芝四
年七月地震八年四月癸丑熒惑掩井鉞八月有
星入參天禧四年四月乙酉西南方兩月重出五
年秋八月兩川稔

仁宗慶歷三年七月戊辰夜西南生黑氣長三大

許經天而散

英宗治平四年彗星見西方

神宗熙寧五年有星行至參旗而沒青白色有尾
元豐二年忠州雨豆

哲宗元祐三年秋七月忠州臨江塗井鎮雨黑黍
四年江津石上生芝二本六莖紹聖元年渝州大
水九月星出參至天倉沒四年三月有蒼白色異
雲長三丈餘貫東井久之乃散

徽宗建中靖國元年正月星出西南如盂急流入
尾崇寧五年正月彗出西方大觀元年二月星出
參如柢急流至西南而沒

欽宗靖康元年春正月丁丑夜赤白氣起西方

高宗紹興二年涪州大疫五月渝涪皆旱十五年
四月丙申彗星見參度五月丁巳化為客星其色
青白至六月乃沒六月乙亥朔日食於井

寧宗嘉定九年二月東西兩川地震三月東川大

水太白經天

理宗淳祐十年六月忠州黃華洲石出雙魚寶祐三年忠州瑞蓮生

度宗咸淳元年兩川地震熒惑入南斗五十餘日
元世祖至元二十年三月庚申太陰犯井是後頻年
屢犯大德五年八月庚辰彗星出井二十四度經
天貫索星長丈餘至天市垣巴蜀之東凡四十日
乃沒

成宗元貞二年彗星出井入紫微垣

武宗至大二年太陰犯參

仁宗延祐三年彗出於井六月重慶大火

泰定帝時碣門天全地震厥後成都及峽中同日
地震

文宗天歷二年太白經天四月重慶火

順帝至正十一年有星孛於西方二十二年秋七
月丙辰熒惑見西方白氣如長蛇橫亘中天移時

乃沒

明太祖洪武十一年榮昌大旱三十年九月長星西
隕冬十月熒惑守心

成祖永樂四年神木出馬湖山夜聞吼聲度險自
出膚寸不損六年八月丙申夜有星大如盞色青
白有光出西方

宣宗宣德六年夏四月有星孛於東井茂州瑞麥
兩岐或五岐

英宗正統五年富順縣產芝一莖二蓋八年黔江
產嘉瓜並蒂麥秀兩歧白燕來巢天順元年綿竹
縣大雨雹三年岳池縣產白蓮一莖雙花

憲宗成化五年夏五月大足縣水漲壞稻及民舍
八年富順縣生連幹梨瑞竹並頭蓮十三年黔江
芝草生安居麥秀一本二歧二十一年春正月朔
有火自中天西墜復化白氣上騰有聲西方有大
星蛇形赤色聲如雷震二十三年江津多虎患縣

令黃昭禱於神乃息

孝宗弘治元年夾江民酈茂實妻一產三男二年
綿竹大旱八年龍見於富順九年綿竹地震十五
年夏六月墊江芝草生秋九月忠州雨黑黍白仁
可食十七年安居石池產瑞蓮

武宗正德二年安居縣官濺河地脉自生沙接兩
岸四年秋七月永川白虹亙天五年威州旱秋七
月廣元百丈關五色雲見十二年永川榮昌界蝗

十五年江津大水十六年武隆甘露降

世宗嘉靖元年秋八月大足產嘉禾四年綿竹縣
龍蟒山竹實七年夏秋全蜀大旱八年春疫保順
潼大饑十年冬十月岳池地震十一年萬縣產白
兔渠縣穀一本三穗十五年春三月岳池地復震
建昌寧番亢甚有聲如雷地裂陷四五尺十八年
三月富順彩雲現十九年夏六月彭縣崇寧新繁
新都金堂大水江津縣牛生二犢二十四年巫山

熊入人家二十五年大足有海鶴飛集城市三十年蒲江一日獲四虎三十四年武隆少婦生鬚三十五年嘉定李樹結為豆三十六年安岳地生白毛長四寸如馬尾四十四年夏四月有星隕於大足形如狗頭入地有聲八月海鶴復集蒲江虎復為患

穆宗隆慶三年羅江民濬井得龍首骨及珠一顆大如鵝卵晶光耀日忽雷震珠復墮井再覓不獲

四年武隆大溪河產騶虞為鄉民所斃蒲江甘露
降於學宮之柏六年夏四月綦江晝晦自午至未
方明彭水縣天降紅雨點衣盡赤

神宗萬厯元年安居二仙石生木連理四月初五
日敘州府地大震十三日復震秋八月敘州府及
雅州俱地震數日二年武隆鄴都蟠蟲生木根如
刈東鄉縣虎伏城郊三年榮昌瑞竹生五年合州
李樹結長豆栗實變桃味甚甘八年三月武隆雨

沙黃雲四塞十一年五月東鄉大水十二年五月朔三夜保縣南溝龍行光如月聲如鼓吹雷雨大作十四年春三月武隆火龍見秋七月重慶虎入城十五年永州有石自行十八年綦江斗米三分二十二年春正月綦江民人見日下復有一日相盪數日方止六月望日有星隕於昭化縣之三堆掘地三尺許得黑石如斗大二十二年順慶有鳥狀如鸞明年大旱二十五年蒲江牛生三犢二十

六年蜀郡邑大疫二十七年順慶鄉民掘地得穴
深廣各數丈內有瓦棺以萬計二十八年冬什邡
桃杏開花成實二十九年秋昭化大水冬十一月
朔金堂縣大雷雨三十年夏五月金堂大雨雹三
十二年正月成都城北閣為大風顛隕北門夜開
夏六月石泉縣地震閏九月龍安保寧松茂地震
二十三日辰時成都郡邑天鼓鳴白霧迷天有火
下流至地始沒三十三年夏五月松潘衛天火墜

秋七月有星如燈火自南墜於西三十四年夏六月成都白龍晝飛三十六年十一月朔建武地震三十八年春正月馬湖敘州地震三月十四日資陽縣火夏四月瀘州大風拔木同時越巂鎮西等處大雨雹同時松潘漳臘小河平番地震三十九年秋九月蜀世子府災宮室俱燬四十一年夏五月蜀府災四十二年除夕通江甘露降味如脂飴次年元日復降四十五年夏四月昭化縣麥兩歧

冬十月成都地震四十六年春正月元日漢昭烈
帝惠陵樹自焚八月初九日有星隕於東南九月
十八日以後連朝地震十月朔日白氣見於東方
四十七年春二月成都白燕來巢三月甘露降是
年屢有地震之異又長星見於東方

光宗泰昌元年冬十二月初八日天黑如夜

熹宗天啓元年成都有禿鷲止於城堞兵象也應
是年奢酋之叛三年夏五月大雪深尺許榮經縣

江邊大石方廣數丈忽飛不知所之

懷宗崇禎二年十二月甲寅地大震十二年成都東嶽廟玉帝像自動不止十三年夏四月天鼓鳴六月安岳紅雨著物俱赤色十六年大足縣李樹結實如刀豆甲申年中 有赤氣數道下寬上銳自東指西彭縣白鹿山裂

皇清順治六年秋七月朔七日一日一月一星以次順行至晚乃沒九年夏四月初九日洪雅縣聞空中

如炮聲者三繼如鳴金數聲少頃如笙管迭奏十
四年春三月朔威州汶川地震有聲山傾水沸並
成都西南方俱動十六年秋靈雨不絕保寧城圯
錦屏山亦傾陷如截去一面成赤壁

康熙元年黎州山顫數日下陷溪水不流二年夏
四月名山縣天目寺前一山入地成淵三年冬彗
星見長丈餘自翼軫經東井止於婁歷十五宿而
隱七年春有白氣自西方亙數十丈下銳上濶光

如銀形如竹筴凡兩夜始散八年夏四月茂州麥
秀七岐九年夏五月西充夜雨溪漲水溢城圯百
十丈十年夏五月綦江縣雨雹偃禾十五年夏南
充縣大水十六年春三月十九日順慶府有甘露
降味如飴夏四月初六日又降秋九月初二日又
降十七年夏蓬州大水十九年歲大熟二十年歲
大熟二十有一年夏六月綦江縣暴雨魚坎巖頽
壓民居二十有三年保寧府旱三十一年秋七月

嘉眉綿濯新津河水汎漲損民居傷禾稼三十三年西充大有年三十四年蜀中郡邑大有年三十五年秋八月大竹縣民蔡秉賢妻王氏一產三男嗣是自三十九年及五十九年廿載之間蜀中一產三男者凡七見云四十七年綿竹縣麥秀六岐或四五岐五十二年秋七月茂州地震疊溪平番城圯五十五年秋八月松潘衛地震

雍正元年全蜀大稔二年冬十月簡州民王之佐

妻一產三男三年夏六月西爐地震七年夏四月
旬有二日瑞雲現於建昌五色呈彩光華捧日凡
歷午未二時六月旬有三日瑞雲復見於敘府之
師來山自東北而西環繞數十餘丈五色燦爛拱
捧太陽歷未申酉三時八年夏六月初七日瑞雲
見於黃陂雷波正西一帶五色絢彩光輝四映歷
申酉二時九年春正月崇慶州民孫文林妻王氏
一產三男秋九月南川縣產嘉禾穀穗十二莖每

莖三穗十年春正月初三日寧遠府西昌縣會理
州德昌河西迷易三所等處地震兩院具

奏奉

旨發帑賑恤先是分巡建南道副使馬維翰奉委預行
查勘巡撫憲德親至寧遠府屬西昌等處被災地
方督率各屬吏逐戶查賑軍民之家莫不懼忤共
戴

聖恩高厚云是年夏五月義眉榮經雅安眉州被水災

眉為甚建昌道副使馬維翰請發帑金賑恤義邑
其榮經等處亦各發常平倉穀以給災民又請豁
免本年地糧銀兩秋九月省城

先農壇藉田並郫縣藉田民田內各產嘉禾或三岐
三穗或兩岐兩穗俱堅實穎粟異於常穀民間耆
庶咸稱罕覲焉十一年夏五月戊子直隸潼川州
鹽亭縣永賢鄉民楊士榮家牛產一麟身高二尺
長二尺五寸頭中挺一肉角長寸許目如水晶週

身鱗甲遍暈青霞兩脊旁至尾各有肉粒如豆色
如黃金膚身馬腿牛蹄產時風雨兼至金光四射
草木映黃士民往觀咸稱祥瑞

四川通志卷三十八之四

欽定四庫全書

四川通志卷三十八之五

風俗

詩稱文王之化行於南國江漢之間實漸被之然則蜀土之淳風有自來矣其未列於十五國中者或以其附見於二南非畧之也厥後文翁之教育武侯之政治後先接踵俗稱近古歷代以來習尚與時移易今則幸逢

盛世仁漸義摩翕然向化蜀雖邊徼地秀者服詩書
之澤樸者安耕鑿之常孝弟力田敦本務實彼夫
輶軒至止問俗采風莫不頌

聖主至德涵濡引恬引養有自然登時雍而臻風動者
矣作風俗志

全省

周文王之化被乎江漢之間秦豳同詠故有夏聲

華陽
國志

巴蜀之人少愁苦而輕易蕩佚

通典

家有鹽銅

之利戶有山川之材居給人足以富相尚

逸史漢景

帝時文翁為蜀郡守建立學校自是蜀士學者比

齊魯焉

文獻通考

化杜宇之教而力農務

逸史

民食魚稻

無凶年憂

漢志

人多工巧綾錦雕鏤之妙侔於上國

隋志

成都府

古蠶叢之國其民重蠶事故國中二月望日鬻花

木蠶種號曰蠶市

舊志

地大而腴民勤耕作無尺寸

之棄歲三四收

宋志

文翁治化猶存南軒道教尚在

舊志風雅英偉之士命世挺生

華陽國志

民俗儉樸習尚

淳良

雙橋志

務農業儒無為匪作奸

溫江志

力耕織尚

禮文

新津志

俗樸民淳文風亦駸駸日盛

金堂志

業耕

讀寡爭訟遠佛老

新都志

民和俗阜敦詩說禮有鄒

魯風

簡州志

生聚漸繁頗興禮讓男耕女織士安絃

誦

崇慶州志

士樸民厚頗稱淳風

郭縣志

俗尚氣節民知

耕鑿

灌縣志

士皆敏慧人皆樸質

崇寧志

民富俗淳人

文蔚起

新繁志

人士俊乂民樸而豐

漢州志

家敦絃誦

野洽農桑

什邡志

士敏慧民質樸

彭縣志

重慶府

江州以東其人半楚姿態敦重墊江以西精敏輕

疾上下殊俗

華陽國志

二江商販舟楫旁午

方輿勝覽

民力

稼穡士喜靜退其風淳質近古

元一統志

士愿而好學

府舊志

邑稱知禮人敦齒讓士隆文學農重耕耘

江津

志

人尚勤儉士習詩書俗之剛悍漸化

長壽志

民樸

訟少

永川志

俗尚節儉民勤本業

璧山志

男耕女織淳

質未漓

榮昌志

力田務學富教可加

大足志

務孝弟而

勤力田黠浮華以重本業

綦江志

風俗樸淳服養簡

質

南川志

土僻民淳儉而好學

黔江志

風俗樸厚秀異

間生

合州志

山險水難人多戇勇然工藝術

銅梁志

人

性淳樸不尚浮華

定遠志

士多尚志個儻不羣

忠州志

士民淳樸服食儉約

鄮都志

民性淳樸喜以詩書自

娛

墊江志

夏巴蠻夷悉遵禮法

涪州志

治絲衣布儉樸

可嘉

彭水志

保寧府

地暖氣清民淳事簡

宋太守李獻卿南樓詩序

質直好義士風

淳厚

閬中志

人好禮義猶有古風

蒼溪志

士民淳厚恭

儉而文

南部志

城南純帶巴音城北雜以秦語

宋寧武廣

元志

儉樸相尚民情頗淳

昭化志

人安儉約惟尚農桑

巴州志

人務耕桑士敦禮義

通江志

質樸勤農循理守

分

南江志

人性謙和百貨所聚

劍州志

順慶府

古稱忠義之邦其民淳樸溫厚

舊志

漢以名節著唐

以神仙浮圖顯宋以文章學術名

宋開漢志

近代儒風

尤盛人物間出不減果遂之風

宋郡縣志

女勤紡績而

不肆志逸游男力耕耘而恐身試刑法

西充志

婚禮

親迎務農力作

蓬州志

務農桑而尚禮義重氣節而

飭廉隅

營山志

民務耕士務學不事商賈

儀隴志

土膏

饒沃民俗淳厚

廣安州志

士務讀民務耕多秦風楚俗

渠縣志

民耕士讀尚儉樸少儀文

大足志

居人庶富士

務文學

岳池志

民務耕鑿而性質直士習詩書而氣

勇健

隣水志

敘州府

漢夷雜居風俗各異

寰宇記

其士靜而有文其民樸

而易治

孝宗承
園記

人心淳龐民俗古樸

南溪志

民力於

穡士競於文重農守禮

富順志

士習淳正有古君子

遺風

長寧志

士固窮而競於文民尚勤而力於穡

隆昌

志 盜息訟寡民風淳朴耕讀而外鮮有逐末

慶符志

其人誠質其俗樸儉

高縣志

習俗儉素不尚浮華士

敦節義民勤稼穡

筠連志

士勤學問農習耕耨尚氣

節而好禮

珙縣志

士樸民淳水耕火耨

興文志

遵文教

守禮法務農尚樸俗慤而愿

屏山志

建武廳

漢夷雜居風俗各異漢則淳而有禮夷則樸而易

治

建武廳志

直隸敘永廳

漢夷雜處務實尚樸

敘永廳志

人民渾樸婚姻祭葬皆

遵古制衣冠不異中州

夔州府

士風拙朴

宋楊輔書

民淳訟稀

王龜齡詩

燒地而耕

杜詩註亦謂火

耕

踏磧而遊

圖經夔人重武侯人曰傾城出遊八陣上謂之踏磧

藉商賈以

為國有楚遺風

府志

服賈代耕地有山嵐氣粹茶以

辟之

大寧志

士務文學民簡訟詞

巫山志

士習詩書商

賈以鹽為利

雲陽志

人多勁勇士篤儒風民力於農

吉山相助

梁山志

土地肥美風俗淳樸不事賈販惟

務農桑

新寧志

民力農桑佐以魚畧俗頗信巫

萬縣志

俗重田神地無醫藥

開縣志

地僻山深男婦力耕民

淳而質

建始志

龍安府

務農工業力耕火種人性質直俗尚剛勁

隋志

風俗

與武都畧同

寰宇記

尚儉樸服詩書

平武志

尚儉務農

不競詞訟士有古風

江油志

畜牧耕稼俗尚靜約人

性質直禮義漸興

石泉志

儉而不奢俗猶近古

彰明志

番多漢少男曰安達女曰白麻衣惟毳衫是尚食

以酥油為佳日耕野壑夜宿碉房人精悍善戰鬪

教化既久風俗漸淳

松潘志

寧遠府

地處邊末漢夷雜居人情狡悍好訟習尚樸俚少

文邇來民風漸歸淳雅

西昌志

地氣煦和三種居民

各安生業

會理
州志

教化漸通風俗日易

冕寧
志

男女裹

毯披氍毹髮赤足不事修飾

鹽源
志

霑濡聲教習尚

衣冠

越嵩
志

雅州府

山多田少地瘠耕勞男勤本業婦不外飾近山人

戶藉採茶為業

雅州
志

其民質而少文其俗淳而不

薄力農採茶男婦勤苦自甘

名山
志

民質淳厚知禮

節從教化

榮經
志

民稠多土著俗淳而質樸

蘆山
志

高

陽遺黎世為土軍耕稼種茶為業

天全志

地瘠民貧

俗淳訟少

清溪志

直隸嘉定州

雍正十二年陞為府

土地沃美民勤耕織士尚詩書

州志

農耕士讀俗尚

儉節民淳事簡

峨眉志

俗厚風淳人勤稼穡文學漸

興爭訟日息

洪雅志

敦樸尚禮士淳民質

夾江志

男事

農桑女勤紡織雜處居民多務煮海

犍為志

民多樸

實士好詩書

榮縣志

士不輟於絃誦農相安於耕鑿

咸遠

志

直隸眉州

士以名節相尚

唐通義志

俗多近古士大夫貴經術重

氏族其民尊吏而畏法其農夫合耦以相助

宋蘇軾遠

景樓記

士類滋多人崇禮讓力耕務本不尚奢華

丹稜

志

民無游惰士豔科第

青神志

民俗樸儉服稼穡事

陶冶

彭縣志

直隸邛州

臨邛多殷實之家接壤錦里人多敏慧雅慕文學

民樂農桑不務商賈

州志

俗尚禱祀人務耕桑

大邑志

人民質直禮義漸興

蒲江志

直隸潼川州

雍正十二年陞為府

土地沃美人士俊乂

常據論

士通經學民務農桑

潼川

志服食儉約不事奢靡人多務農煎鹽為業

射洪志

地瘠俗古不尚爭訟男女力穡

鹽亭志

俗樸務耕好

學尚義

中江志

民勤耕織士敦禮讓

遂寧志

農務耕鑿

鄉里族黨頗相親睦俗為近古

志 蓬溪

士秀而文民

樸而淳

志 安岳

有無相通憂患相恤

志 樂至

直隸瀘州

氣候偏陽夏多炎燠冬無寒苦

志 宋公

家詩戶書勤

耕樂賦

冊 圖

風氣挺發賢哲間生

志 州

力耕務織士樸

民淳

志 江安

稼穡多勤士好馴雅

志 合江

人多樸直士

敦禮讓

志 納谿

直隸資州

山川挺秀多產英奇王褒諸人皆以文顯

圖經

畫經

夜史誦聲不絕

何三益政文堂記

民和俗阜有鄒魯風

資陽

志

俗近唐魏風比齊魯衣冠之族多於他邑

內江志

地瘠力耕人多勤儉士好文學饒有淳風

仁壽志

土

瘠地僻士好詩書農勤耕女勤織

井研志

直隸綿州

介東西二川之間其俗文而不華淳而不魯

舊志

人

饒地腴貨財繁茂

州志

節儉好禮獄訟寢息

德陽志

力

耕農桑安分守法

羅江志

教化日深風俗淳美

安縣志

士多絃誦民尚儉勤

綿竹志

風淳俗簡農安耕鑿士

習詩書

梓潼志

直隸茂州

其地有六夷七羌九氐各有部落其長頗知書而

法制嚴重

後漢志

盛夏凝凍

華陽國志

俗耐饑寒

圖經

氍毹裘

雜揉

王咨防邊五事

其俗壘石為礫以居如浮圖高二三

丈者謂之籠鷄十餘丈者謂之碣房間有板屋土

屋自汶川以東皆有屋宇

經圖

好弓馬以勇悍相尚

茂州志

漢羌雜處漢讀詩書羌遵王化

保縣志

石田山

地俗尚勤儉咿唔之聲徹於四境

汶川志

直隸達州

土地肥美

地理志

民俗儉勤競尚氣節

白居易州志

夏秋

多瘴雪不到地

州志

男慕文學鮮商賈女多紡織尚

儉素

東鄉志

民重農桑俗少健訟

太平志

四川通志卷三十八之五

欽定四庫全書

四川通志卷三十八之六

物產

百物之生皆以利用記曰地不愛寶又曰物曲有利禹貢載梁州之產璆鐵銀鏤而外繼以砮磬織皮凡以別方物辨土宜也今

聖天子宵衣旰食以節儉先天下雖萬國來同不貴珍異然太和洋溢之氣漸被隩區百昌嘉遂故菽粟

以養生絲枲以蔽體類皆取用不竭卽產於山而
育於水者亦莫不滋長蕃盛呈露精華詩云民之
質矣日用飲食則雖烹葵剥棗瑣屑必加詳焉作
物產志

成都府

麩金

元和志溫江皂水牛鞞水皆出金唐志
陵州蘭州俱貢麩金寰宇記蜀州產金銀唐志

巴西縣銅唐志陽安金鐵唐志新津神泉西錦華
出今無水二縣皆出昌巴西等縣俱出陽

國志成都江水濯錦則鮮明唐志成都及蜀羅唐
州土貢寰宇記成都府有九壁村出美錦志

成都府及蜀州貢單絲羅彭州漢州貢交梭羅襖
字記單絲羅出廣都雙流溫江九域志成都土貢

花綾唐志漢州貢綾襖字記成都華陽新繁
羅綾唐志漢州貢綾九域志成成都府舊貢雜色綾紗唐

成都蜀州貢花紗襖綿紬唐志簡州貢絹
字記成都貢交絲紗綿紬唐志簡州貢絹府土產絕綿

絹九域志懷雙紉唐志漢絲
安軍貢絹雙紉唐志漢絲又拓蠶絲出犀浦縣

布唐志成都府土貢高抒布漢州貢彌牟紵布
襖字記新都出裱布衫段永康軍貢交梭布麻

唐志成都府土貢葛唐志簡州出貢葛
貢溫江縣出葛鹽出馬策

唐志蜀州土貢紅藍馬策鏤金銀器
襖字記永康軍貢馬鞭鏤金銀器府舊貢銅盆

牋紙襖字記成都府舊貢薛濤琵琶捍撥
十色箋短而狹才容八行琵琶捍撥襖字記成都府

舊 荇根鞋

襄州字記漢

合葦

襄州字記漢

蜀漆

襄州字記

舊 藍靛

雙流溫江俱出

酒

唐志成都府土貢生春酒方輿勝覽漢州出驚兒酒明一統志

有邛筒酒邛人割大竹傾餘釀露釀酒開筒香間百步

蔗糖

唐志成都府土貢元和志蜀州

土貢 梅煎

唐志成都府土貢

柑

唐志簡州土貢柑

白藕

成都府出茶

記生益州凌冬不萎三月採乾飲之令人不睡崇慶州灌縣俱出

龍葵菜

襄州字記成都府

舊 梭木

府城出葉似梭有刺其中實而不虛

刺竹

成都出刺皆環節而生名笏竹

醬

襄州字記出成都府

檀木

古稱蜀木惟成都最多如今之大華撥

桐花鳳

襄州字記成都出小鳥紅翠碧色相間出於桐花開時惟飲其汁不食他物花落後死

土人畫桐花鳳
扇卽此鳥也

牡丹

諸色俱備花千瓣而大如毬
兩都所不及一名魚血紅者

獨**嘉魚**

寰宇記細鱗如鱖蜀人謂之拙魚蜀都山
中處處有之每歲春間從石穴出故名

酴醾花

寰宇記成都出有三種一名白玉腕一名
出爐銀一名雲南紅香色甚美蜀人取以

造**旌節花**

寰宇記成都出枝直上花色紅
紫層發如旌節葉碧類百合

海棠

谷

詩濃淡芳春滿蜀鄉半隨風雨斷人腸浣花溪上
堪惆悵子美無情為發揚又有鐵梗海棠其色稍

紅

石榴

寰宇記懷
安軍土產

賽蘭香

葉如豌豆花似粟香甚
清遠楊用修謂不足於

艷而有餘於香戴之髮經旬猶
馨西番有伊蒲佛供卽此花也

天師粟

青城山出
似粟而美

獨房者為異久
食可治瘋癲病

巢菜

夏時種以糞田其苗可食
葉似槐而小其子如小豆

香

稻

各州縣出其氣芬芳

海芋

木幹芋葉高四五尺不可食

蜀葵

有二種一種小者五

色一種大者

木槿

皮能治瘋癰

芙蓉

有二種一種花樹叢生葉大而花深

紅霜降始開因名拒霜花一種開時顏色日凡數

變日初出純白色日中淡紅日晡深紅名換色芙

菰

椒寰宇記蜀州土產成都府各州縣俱出

荔枝

舊蜀府花圃出今無緇土漢

石梯河出

牛膝

舊蜀府出者佳

澤蘭

葉似薄荷芳香亦能治血疾

木蘭

皮

蜀州土貢

金雀花

俗名美人蕉

地丁

黃紫二種

慈竹

七月生笋蔑皮可為

繩甚固又可為麻

赭桐

俗名百日紅

蜜蒙花

能治目疾

木蜜

俗名尤

溪石

灌縣出堅細可作硯

月竹

每月生笋可為筆管

紫貝龍牙

永康軍產白

貝龍牙

永康軍產

花斑竹

新津最盛

何首烏

彭縣崇慶州俱出

木筆

一名辛夷

續髓

陵州貢

朴硝

成都出

紫草

新津縣出

升麻

彭縣出

續

斷

彭縣出

苦藥

陵州出

川芎

灌縣崇慶州出

沙參

瓜蒌

紅

薯

櫻桃

紫薇花

天花粉

楊梅

崇寧縣出

重慶府

麩金

元和志涪州貢麩金新唐志昌州合州俱貢麩金忠州貢生金寰宇記渝州黔州皆產麩

金鐵

各州縣出

紬絹

新唐志忠州貢綿紬寰宇記昌州貢絹九域志南平軍涪州貢絹

布

元和志渝州貢葛昌州貢苧布南州貢斑布漆州貢楮皮苧布涪州貢布黔州貢竹布苧麻布

合州亦貢葛新唐志貢州貢獠布寰宇
記昌州貢斑布九域志渝州貢葛布
水銀寰宇記黔

州鹽華陽國志臨江縣有鹽官新唐
志巴縣壁山彭水二縣俱有鹽
丹砂華陽國

丹興縣出丹砂新唐志漆州貢丹砂黔
州貢光明丹砂寰宇記黔州產硃砂
蠟華陽國

出蜜蠟元和志漆州黔州貢
黃蠟新唐志涪州貢黃蠟
粉華陽國志江州產

茶華陽國志
涪州產茶
石膽寰宇記渝州
大龜明一統志涪

中可卜世
號靈龜
象牙寰宇記南州
犀角新唐志黔州貢

柑橘華陽國志江
州有柑橘
麝香新唐志
荔枝出涪州城西

有妃子園中有荔子百餘株顆肥為楊妃所喜當
時以馬馳載七日夜至京人馬多斃然蜀中荔枝

敬瀘之品為上涪川次之合州又次之
今止嘉定州有數株餘州少有植者
蒟醬
元和志涪

州**桃竹筋**
元和志合州貢寰宇記渝州產桃竹
文鐵刀
元和志涪州貢新唐志忠

州涪州皆貢文刀
蘓薰席
墊江以蘇薰為席絲為輕其邑深碧又涪州產席渝州產竹簾

雙陸子
新唐志合州貢
扇
寰宇記蜀涪州出扇為時所貴
苦藥子
忠州出其性寒

可解一
實竹
綦江縣出
引藤
忠州出大如指中空切熱毒
土降

香
黔江涪水俱出
松屏
出涪州石山間不
補骨脂
合州出
書

筒
新唐志合州出
黃心樹
忠州出白居易呼為黃心樹高四五尺經

冬不凋身如青楊葉如桂花如蓮香邑艷膩
超然獨芳四月初間花開及謝僅二十餘日
牡丹

出 合州

靈壽杖

出 涪州

花竹簟

縣出 江津

九節狸

縣出 長壽

威靈

仙酥油

花粉

方竹

縣出 俱南川

酉陽司

雍正十二年裁改

花斑竹

嘉州出

降香

蠟

俱西陽出

野猪

石耶出

邑梅洞長官司

白鵬

畫眉

五味子

厚朴

平茶洞長官司

黃蠟

楠木

土降香

樟木

花斑竹

花班

布

保寧府

金

華陽國志晉壽縣有金鑛新唐志利州貢金又劔州巴州貢麩金

鐵

唐志綿谷縣有鐵

綾絹

元和志劔州貢綿絹唐志閬州貢蓮綾綿絹絢辟州貢綿絢寰宇記利州產絢劔州產絢

集州產小絹段氏蜀記云果閬二州出絹長五十尺重一斤其色鮮白

布

唐志劔州利州貢絲

布巴州實布寰宇記閬州產獠布辟州產麻布及絲布

梁米

唐志利州貢鹽唐志閬州

南部茶寰宇記巴州產

黃蠟

唐志利州集州貢寰宇記集州辟州產蠟

石蜜

唐志

巴州貢寰宇記集州產蜜

席

唐志劔州貢蘓薰席圖經云蘓家三稜草席

橙

唐志巴州貢蜜

字記利州產紙寰宇記劍馬策唐志辟州貢朱慶送辟

路山見採鞭人段氏蜀記云辟州進貢鞭諸道不及鯨魚唐志利州貢寰宇

葛粉唐志劍花油唐志巴薑鞭寰宇記木竹節疎

廣元巴戟巴州劍附子天雄俱利漆南部天

白藥巴州龍頭竹娑羅樹巴州劍當歸閬中

麝香降香乳香天門冬芎藭以上俱攢

絲即紡絲各州楮紙烏頭黃連竹根酒注

巴州桃笙巴州方言謂簟為笙桃笙乃桃竹簟也

順慶府

絲絹

唐志貢絲絹布蓬州渠州俱貢綿紬寰宇記廣安軍產絲布明一統志南充蓬州廣安渠

縣俱出絲

鹽

唐志南充西充有鹽明一統志各州縣俱有鹽井

黃柑

方輿勝覽南充縣出

買子木實

唐志渠縣出

鐵

後漢志巖縣有鐵唐志隣山縣有鐵寰宇記渠州出鐵器

冬青蠟

明一統志營山縣出

蘭蕙

明一統志大小蓬山出

鷄父草

五月五日

採

山大豆

八月採本草無名

天門冬

南充縣出

紫梨

出廣安州入口卽化

佳者

敘州府

葛

唐志戎州貢葛纖宋

麻布

元和志開元間

蘭

符慶

縣

石門山出因名

仙茅

明一統志

苦笋

明一統志

蘭山黃庭堅有記

仙茅

仙侶山出

苦笋

宜賓長寧

二縣出黃山谷賦熨道苦笋冠冕兩川甘脆愜當

小苦而成味溫而縝密多啖而不痛益苦而有味

如忠諫之可治國多而不害如舉士之得其賢是

其鍾山川之秀氣故能深雨露而飽風煙食穀以

之啟迪酒客為之流涎彼桂鹽富順長寧二

班之與蘆蕨安得與之同年鹽富順長寧二

明一統志府荔枝本府出土人善為荔枝煎可以

境出可為杖荔枝致遠黃庭堅詩王公權家荔枝

綠廖家平家綠荔枝試傾一盃重碧色快剥十顆

輕紅肌發醅葡萄未足數堆盤馬乳不同時誰能

品此勝絕味惟秦吉了聞見錄長門軍有鳥名秦

有老杜東樓詩秦吉了者能人言一日有蠻

人將錢五千買之長門軍告以貧苦將賣汝秦
吉子曰我乃漢禽不入蠻地遂死至今不產
銅

鼓

本府出相傳諸葛亮所鑄上者值銀
數十鎰次者值數鎰新鑄者非所重
統帟 諸夷 織絲

為之其色似茜而雜以青白文彩斑斕長
六尺縫兩端以為帟束於腰故名統帟

狨皮煖

坐

寰宇記戎州人進獐獐得皂褐碧三色相間出
馬湖江石門兩路蠻界郡國志云獐道有獸名

獐糊似猿取此皮為狐
白之用盈百方成之

五加皮

取其皮陰乾囊之
以浸酒服之能延

年去疾葉有
五尖者為佳

金星草

本草云戎州為上解癰疽及
丹石毒喜生竹箬大木下

紫貝龍牙

本草云能解一切
蛇毒又可治喉痛

藟醬

史記所載藟醬
即此各屬俱出

楠木

年久向陽者凝結花
紋俗呼為鬬柏楠

餘甘

狀如川練子初食
味苦澁少頃回味

甚甘獨本葱

元初馬湖蠻歲以獨本葱來獻郡縣疲於遞送成宗初罷之

半夏

升麻 黃連 杉木

夔州府

紵

唐志夔州貢紵開州貢白紵

紬絹

唐志通州貢紬九域志雲安軍貢絹新志雲陽梁山

開縣俱出絲紬絹

綿

唐志通州貢九域志梁山軍貢綿

布

唐志夔州開州貢布新志雲陽

梁山建始縣俱貢葛布

金

唐志萬州貢麩金明一統志萬縣建始縣俱出金今無

錫

唐志

夔州鹽

漢志巫縣胸臆有鹽官唐志奉節雲安大昌南浦萬歲皆有鹽官寰宇記開通二州

產鹽宣漢有鹽場

鐵

新志雲陽巫山建始三縣俱出

漆

寰宇記通開二州產新志雲陽建始

縣蜜蠟唐志夔州開州貢蜜蠟寰宇記開州產蠟

山梁山建桐油新志建始縣出紙寰宇記萬州產蠟新志

始縣俱出通州貢麝香楓香寰宇記通州酒水經注魚復出

產挺子白膠香萬州產白膠香杜詩聞道雲安

麋米春纔傾一盞卽醺茶唐志夔州貢茶通志建

人據此則雲陽縣亦出始開縣產茶新志萬縣

巫山柑奉節至橘漢志魚復胸脰有橘椒通志奉

俱出官唐志夔州貢橘椒節雲陽

巫山建始縣產瓜疇芋區寰宇記夔州產疇似薯

紅椒開縣亦出瓜疇芋區似貫瓜皆伏草根

吐綬鳥

大如翟而五邑可愛

苦藥子

梁山縣出

巴戟

夔州府出

厚朴

雲陽

縣白藥

芨苳實

開縣

黃蘗

夔州府出

黃連

建始縣出

太乙

元精石

雲陽縣產

木藥子

萬縣出

麩

色白味甘熟後隔日不腐

鯉魚

鰻魚 山雞 熊 羆 鹿 鹿

石砭宣撫司

黑鉛 麋皮

龍安府

金

華陽國志剛氏縣有金銀礦元和志浚水出金唐志龍州貢麩金

和

鉛錫

府治江油石泉

俱出鐵

唐志昌明出鐵水銀

昌明縣出

羚羊角

唐志龍州土貢

葛粉

唐志龍州

土貢歲歉民資為食

蕎麥

有苦甜二種民資以為食

酥油

唐志龍州土貢

牡丹

有數

色紅紫白一捻紅俱重臺花
大如盤本可繫馬甲於他處
救軍糧小木本實殊

珊瑚味甘可食昔有軍
糧不足以充食故名
千歲穀苗穗俱似鷄冠花

山坡
禹血石出石泉禹穴下石皮如血染
鹽唐志

縣
茶寰宇記昌明縣連西山出者並佳獨龍安松

有茶名
獸目茶
芍藥
楮紙出江
厚朴
附子出彰
胡桃

石榴
石菖蒲
羌活
牽牛
穿山甲出青
杜

仲
天雄
牛膝
天南星
當歸府治及各
黃

精
香臍
史君子俱出
半夏府治及各
莎羅

花

出江油縣

羅紋

出青川

貝母

羅漢松

出青川

大黃

府治及各

縣俱出

椒

枳殼

出石泉縣

烏頭

錦雞

碎剪羅

出江油縣

山雞

麂皮

鶯

鵲

鷄

熊

虎

豹

猴

野猪

山羊

蜜

蠟

松潘衛

貝母

平番出甘鬆無渣者佳他處皆不及

五加皮

虹橋關出者佳能治風濕腳氣

大

母藥

雪山石塊上出有雌雄二種出必雙出大補元氣故名本草不載

藍布布

草本

能治脚氣壯筋骨

甘松

當歸

羌活

朴硝

麝香

鹿茸 酥油 旄牛 氍子 毛毯 羊皮 零

香 黃羅傘花

俱衛治出

寧遠府

銀

會川衛出明常置銀場

銅

漢志邛州南山出銅華陽國志會無縣大馬河中有銅胎明一

統志寧番鐵後漢志會無縣出元和志臺絲布元

和

志嵩鹽

漢志定茂縣出鹽明一統志會川縣出鹽

碧

漢志會無縣東山出碧

石青

明一統志

石綠

明一統志會川縣出

空青

越衛山石中出

不朽木

越衛衛海棠堡出土人

火布

逸周書說火浣之布入火不滅布則火色

垢則布邑出火而振之皎然疑乎
雪太平寰宇記火浣布出蜀建昌
石菖蒲一寸九節鹽源

縣出靈蛇膽治諸毒瘡
蛤蚧西昌縣出
羶海棠
鉛
茯苓
杉

木

雅州府

麩金

元和志州貢寰宇記浮圖水出貢金

綿絺葛

元和志州賦

仙茶

名山縣治

之西十五里有蒙山其山有五頂形如蓮花五瓣
其中頂最高名曰上清峯至頂上畧開一坪直一
丈二尺橫二丈餘即種仙茶之處漢時甘露祖師
姓吳名理真者手植至今不長不滅共八小株其
七株高僅四五寸其一株高尺二三寸每歲摘茶
二十餘片至春末夏初始發芽五月方成葉摘採

後其樹卽似枯枝常用柵欄封鎖其山頂土僅深寸許故茶不甚長時多雲霧人跡罕到書曰蔡蒙

旅平卽此山與落雁木元和志邛竹元和志邛崃府城東蔡山也

堅實可黃連寰宇記州產龍頭鳳尾身有鱗甲名曰雅連甲於天下升麻寰宇

爲杖石菖蒲寰宇記州土產丙穴魚明一統志州南有丙

蠲紙寰宇記州土產鮑魚狀似鮓有足大頭長尾聲如嬰

山溪竹鼈雅安縣出虞美人草和夷壩出人歌娑羅花

花有五色如欄錦照映山谷椒元和志貢黎椒寰

移之他處則枯瓦屋山出椒元和志貢紅椒明一

統志貢馬方輿勝覽宋置茶馬買馬兩麝香府治

州俱

天南星

府治清溪俱出

松明

府治出

酥油

雀羅花

烏茶

嘉魚

錦鷄

毯子

麈

蠟

俱天全州出

直隸嘉定州

雍正十二年陞為府

麩金

元和志貢

鐵

九域志州有監鑄鐵錢

絹綿

元和志州貢寰宇記貢水波綾

烏頭

布麻

元和志貢

紫葛

元和志貢

鹽

捷為縣東山出

茶

九域志洪

雅縣有買茶場明一統志

荔枝

州境出

橘柚

文選蜀都賦戶

有橘柚之園注曰出捷為南安

海棠

產嘉定者獨香其木合抱

魚舅

味極佳惟嘉定州有

之嘉魚

每歲三月隨水而下至七月逆水而上

黑頭魚

形如鰱長者及尺惟郭璞

巖前有之世傳璞著書巖上魚吞洗硯之墨
故其頭黑每歲二月間出十餘日卽不見
草節

鉛

丹房鏡源云草節鉛土硝
打之卽碎嘉定州出
居民取之以糞
黃連

王不留行

夾江縣出

花椒

巴豆

紅花

佛手柑

香櫞

茉莉

綿紬

放光石

楠木

萬年松

杉木

欖絲

丁公藤

梭羅木

絲

斑竹

月竹

每月生笋以
上俱州境出

金毛狗脊

夾江縣出

直隸眉州

麩金

元和志州
貢今無

硝

州治東館鄉
鷄兒井出

寒水石

慕頤山出

獠麻

布

元和志
州貢

柑

元和志
州貢

紫笋

海棠

白芨

蜜蒙

花

鬱金

木通

史君子

巴豆

斑竹

杉

木

白蟹

木獺

鷓鴣

以上俱
眉州出

直隸邛州

鐵

漢志臨邛縣有鐵
官蒲江縣亦出

鹽

漢志臨邛縣有鹽官

絲布

元和志
州貢

細

葛

寰宇記州土產又伐蜀記云
鎮南蕉葛上上者匹值十千

紅花

寰宇記
州貢

續斷

寰宇記

硯

明一統志蒲江出頗發墨
但石色土灰粗而不潤

斑竹

出大
邑縣

石

出大邑縣蒲河中其形如卵色如
松花最佳者如綠玉細潤可愛

山礬花

明一
統志

州出花繁如雪香氣極濃

木蓮花

本州出花分四色白鶴山有之

茶

寰宇記臨邛四邑有

火前火後嫩綠黃等號又有火蕃餅每餅重四十兩入西番党項重之如中國名山者其味甘苦九

域志有火井茶場

邛竹

草簞

直隸潼川州

雍正十二年陞為府

銅

元和志飛鳥銅山二縣出

鐵

新唐志通泉縣有鐵九域志通泉東關二縣出鐵冶明一統志

鹽亭射洪俱出鐵

綾絹

元和志遂州貢綾普州賦絹又鹽亭縣有驚溪絹宋文同詩待將一

片驚溪絹掃取寒梢萬尺長蘇軾詩為愛驚溪白繭光

葛

元和志普州貢

空青

元和志州

貢空青

庶霜

遂寧出宋時入貢唐大厯中有僧跨一白驢至傘子山下結茅以居環山之民

素以植蔗凝饴為業僧白驢頗食民蔗民苦之詣僧僧曰汝知蔗之為饴而不知饴之為霜其利十

倍因示以法遂成蔗簞寰宇記鞋靴寰宇記柑元霜色如琥珀稱奇品遂州出

志遂州橘州境棗方輿勝覽普梨方輿勝覽普貢柑出

方輿勝覽普曾青州境天門冬元和志芥根寰宇州出天池籍出

州桃竹江心蟠石上生可為杖竹譜云竹性中皆空惟此竹獨實如木杜甫詩江心蟠石生

產桃竹蒼波噴浸尺度紫葛根寰宇記鹽鹽亭蓬溪足斬根削皮如紫玉遂州產

諸縣皆有鹽井明一統志本常山紋石中江州及所屬七縣俱有鹽井縣出

鹽亭
縣出

直隸瀘州

麩金

元和志州貢中江水出

麻布

元和志州貢寰宇記州產斑布茶本州產

味辛性熱飲之可以療風通呼為瀘茶

鹽

華陽國志漢安縣有鹽井醬州貢

花

竹簞

寰宇記州產

大黃

寰宇記州產

杏仁

寰宇記州產

石青

明一統志

瀘州土產

石綠

明一統志州產

荔枝

杜甫詩憶過瀘戎摘荔枝清風隱映石逶迤京中舊

見君顏色紅顆酸甜只自知

楠木

明一統志州產

桃竹

江安縣出

巴豆

合江縣出

鯉魚

本州出

佛手柑

香薷

直隸資州

麩金

唐志資州出

麻

元和志資州出貢麻布

蔗饴

寰宇記資州產甘蔗志

資州土貢柑

高良薑

寰宇記州產

葛布

資州出

香楮

內江出

直隸綿州

麩金

唐志綿州貢麩金華陽國志梓潼郡地出金銀

鐵

唐志魏城出鐵梓潼縣雁門山出鐵

錦

唐志綿州土貢錦綿州又貢紅藍蜀錦

綾

唐志綿州貢綾新唐志梓州貢紅綾寰宇記梓

州貢花紋綾九域志梓州貢白花綾

紗

寰宇記綿州產交梭紗今無

綿紬

寰宇記綿州土

貢雙紉

唐志綿州土產輕容雙紉

鹽

唐志魏城薛城俱出

蜀漆

寰宇記綿州土產

緋紅

寰宇記綿州土產遊蜀記左綿郡有水所染緋紅濯後益鮮

蔗饴

唐志綿州土貢

甘蔗梓州貢蔗饌寰宇記梓州貢沙糖白藕唐志綿州土貢空青元和志梓州貢空青

寰宇記梓州產石綠地黃紅花寰宇記梓州產紫參川芎烏

頭寰宇記綿州產鏤金銀器唐志綿州土貢柑橘元和志梓州貢

貢柑子及橘皮寰宇記梓州貢柑橘

直隸茂州

麩金唐志茂州貢麩金丹硃唐志茂州土貢今無麻唐志茂州土貢麻布乾酪

蜜寰宇記茂州土貢芋華陽國志汶山白玉石似玉土人取以作器

汶川縣出犛牛尾唐志維州土貢犛牛寰宇記茂州土產無角一名童

牛肉重
千斤

五角牛

寰宇記茂
州土產

麝香

五味子

花椒

疊溪營

犛牛

偏牛

香豬

馬鷄

毯子

毛毯

麝

香

直隸達州

布

唐志通
州貢綿

鐵

新志東
鄉縣出

桐油

新志達
州土產

蜜蠟

九域志東
鄉太平二

縣
出茶

唐志通州東
鄉太平俱出

椒

新志達州
東鄉縣出

楓香

麝香

俱達
州出

鹿皮

新志達州東
鄉太平俱出

熊

羆

達州東鄉
太平俱出

四川通志卷三十八之六